

宜春縣志卷二十二

人物志

人才所以儲國用而勵風俗出處不同志趣各異宜邑  
山高水清鍾靈毓秀代有偉人道德勳猷文章氣節彪  
炳史乘者固班班可考卽山林隱逸之士奇特夙慧之  
才亦自不乏揚鑣分道各以類從緬想幸規稽諸典冊  
令人有鼓舞奮興之思志人物

名臣

漢

陳重字景公少與鄱陽雷義友善俱學魯詩顏氏春秋陽



嘉元年豫章郡太守張雲舉重孝廉重以讓義前後十餘通記雲不聽明年亦舉孝廉重與俱在郎署有同署郎負息錢數十萬貫責主日至詭求無已重乃密以錢代還郎後覺知而厚辭謝之重曰非我之爲將有同姓名者終不言又同舍郎有告歸者誤持鄰舍郎絊以去主疑重所取重不自申說而市絊以償之後同舍郎至以絊還主其事乃顯後重與義俱拜尙書郎義黜代同時人受罪以此黜退重亦以病免義復舉茂才亦以讓重刺史不聽義遂佯狂被髮走不應命時人爲之語曰膠漆自謂堅不如雷與陳未幾三府同時皆辟授重細

陽令政有異化舉尤異當遷會稽太守遭姊憂去官後爲司徒所辟拜侍御史二人同隱居鷄足山卒合葬今卽其地名陳雷里重祀鄉賢祠參載後漢書

明

高琬字德資成化戊戌進士歷知松陽上海二縣治行第一擢南京監察御史陞松江知府歷浙江左布政使右副都御史撫治鄖陽器貌端重曉達民事慎名檢守松江俗尙侈靡身爲儉約食不重肉客至魚鱸果脯一飯而已河南襄漢盜起琬同都御史彭澤討平之璽書獎勵賜白金文綺召還將大用遂謝病歸年八十有五卒



初姓劉後復姓高祀鄉賢祠子祉詳宦業傳載通志  
何偁字邦美嘉靖己丑進士授舒城守持廉秉公吏民畏  
服擢兵部主事改河南道御史巡撫蘇松一意激揚微  
行出訪有舟子爲地方害竟治之三吳大吏憚其嚴正  
入掌計典公平不阿林居十載執政復以書起辭曰吾  
守吾舊不能降心以從人也每郡中有大利病侃侃陳  
說人德之載通志

楊以誠字明夫嘉靖戊戌進士授行人奉使岷藩擢廣東  
道御史巡陝西茶馬嚴絕吏弊復巡按廣東約浮費簡  
將士彈劾不職賍吏望風解者十餘人兩監棘闈搜剔  
積弊歸里時行李蕭然人服其清後復起歷陞福建按  
察司僉事卒於官載通志

易可久字德卿號鳳坡生稟奇姿雄踞詞壇嘉靖乙丑進  
士令吳縣聿著賢聲調金華司李政清刑平分房拔士  
皆名俊陞工部主事督修皇陵歷有成績適值黎人叛  
亂以可久素嫻將畧命征之撲滅奏凱超擢廣東僉事  
遇海寇載貨至郡借貿易爲名偵探虛實可久廉得其  
情執以獻有內監欲匿貨不報可久堅拒成隙反唇誣  
奏命下都御史海瑞審訊搜其家僅書籍及敝衣數件  
而已遂復陞四川參政未幾因親老解組歸囊篋蕭然



宜春縣志 卷三  
工于詩文惜其稿悉爲賊焚載前志

袁業泗字時道號景源萬歷戊戌進士知樂清縣改蘭谿  
丁父憂再補龍溪所至著循績擢南京兵部職方主事  
進武庫員外郎中特疏請撤湖口稅璫李道遂罷其權  
江上下千里稱便知漳州府漳故多盜業泗悉梳治之  
士民親附乙卯歲饑發倉賑之又勸民出粟分遣諸吏  
乞糶潮陽諸鄰郡以濟不給治屨置藥拯救無遺力全  
活數千人後入覲漳民繪圖祀之內辰陞福建屯鹽道  
副使念母年八十餘乞養家居天啟中閹黨魏忠賢等  
亂政堅卧不出崇正改元召補廣西副使分守左江其

俗多不知學業泗誘以文教士類興起遷廣東參政分  
守嶺東與分巡謝璉平九連山賊地介惠潮多反側肇  
置連平州所部以安遷浙江按察使未至以功賜白金  
文綺徵爲南京鴻臚寺卿加一秩將赴浙時會廣寇劉  
香等蠡起震濱海諸縣督府畱與決策議者請撫業泗  
不可曰國家全盛蠡爾鼠子憑山海陸梁義當滅此朝  
食議撫是長盜也且賊性觀望巨測聽之殆矣督府猶  
豫不能用遂謝去代任者果以輕撫墮賊計死乃合兵  
勦平悉如其言是時有識者爭倚重之後在鴻臚二年  
嘆曰卿曹雖可卧治奈何老不知止哉再疏乞骸骨歸



至甲申三月聞京師陷痛憤成疾八月終于家爲人端  
亮有介節高行年八十一乞養家居者十三年予告者  
十年杜門屏跡篋無長物自守令至藩臬分司多在閩  
粵間山陬海澨威著惠行閩粵五嶺之民皆曰是于我  
大有造其守漳時黃石齋道周爲諸生獨早識之卒爲  
名臣嘗修郡志辨袁州糧額誤編狀請紓民困後議汰  
浮糧卽引爲依據表黃太常子澄遺事具載于志他如  
周族黨建義倉治橋梁凡有裨于郡者輒身先之不以  
私干公府文詞詳贍樸茂著有訓蒙編燕游草兩朝奏  
議秀橋歸來集若干卷祀鄉賢祠子二繼樟貢士早卒

繼梓康熙甲辰進士詳儒林傳載通志

潘士聞字亦式少秉英姿一目十行稍長馳聲藝苑邑令  
錢器之戊午己未聯捷進士初令鉅鹿調繁所在著廉  
能聲擢工科給事中糾劾無所顧忌丁卯典試閩省入  
彀皆英雋注念母年漸高解組家居清約如寒士足不  
輕履公庭有以干謁促者悉婉辭以謝值丁丑臨藍盜  
至攻圍郡城士聞偕郡守令諸紳士竭力固守城賴以  
全每遇地方諸大弊輒率邑人士白當道一舉而盡釐  
之民皆德焉子師質令嘉定諄諄以愛民禮士訓時有  
清風邵德之譽載府志



袁一鳳號鳴岐萬歷己未進士器宇修偉操履質實任工部主事陞虞衡員外郎中曉暢吏事善治繁劇逆璫廉其能有意鈎致之一鳳持不爲動守西安清介自持未幾遷浙江副使時海塘崩潰奉旨修築估費十五萬金身任其役用四萬而工成浙人德之歷楚藩臬久之以塘功加右布政使癸酉卒於官祀海鹽縣名宦祠著有驚秋詩集行世載通志參浙江志

宦業

唐

彭伉貞元間擢進士第授石泉縣令歷官岳州錄事參軍有政聲載通志

宋

易言字應之少任俠有口才真宗朝覆水蠻寇宜州邊帥不能制募辯士往說之言應召單騎往酋長迎之喜待之甚恭後竟歸順休兵言書永利二字於木填之以金因廣西帥遣使入貢真宗嘉之賜以官言任氣居官不能久後元昊擾邊近臣多薦言可任上見其老不欲遣



行但令赴流內銓任樞府司戶參軍載通志

李衢字叔達大中祥符元年登第官至屯田郎中明道中  
通判筠州爲性寬慈不擾民有婦人輸官絹以兩段縫  
合爲一疋吏執詣衢詢其故婦人曰官中催科限逼而  
夫逃竄貧無所出是以此衢惻然良久遣其婦人去  
給主吏曰封絹於庫內俟支春衣下官自要他前官受  
秋租而吏恣取無藝衢知之遂日入倉監視吏無所措  
其手筠人爲之語曰輸租不使錢賴有李屯田每出則  
人呼曰李佛子來矣子士安士燮孫珏皆登第載傳信  
錄參府志

李士燮字和甫初名梁登慶歷六年第後改今名爲人剛  
正不撓所至吏民畏愛嘗知郴州人未嘗見其笑容仕  
至職方郎中載府志

曹傳元符三年與弟藻子遷同登進士人名其堂曰三桂  
傳官至朝請郎知常州藻宣教郎知益陽縣遷通直郎  
知郴州兄子邁崇寧中進士積官中奉大夫廣西運判  
直祕閣兼權安撫使載府志

趙善堅字德固乾道間進士簽書婺州判官朱子爲浙東  
常平使器之歲旱賑卹有條所全活甚多歷官皆有治  
聲官至戶部尙書載通志



孟浩字養直乾道間進士知武寧有治聲王藺自豫章召  
參大政力薦之朝選國子監丞出知湖州與貴幸忤罷  
歸起爲潼川路轉運判官尋以直祕閣提舉四川常平  
茶馬浩狷廉不妄取與強明精敏洞見事情常以州判  
官攝臨江軍奉給一無所受爲文章有法度所著有歸  
技集載通志

元

袁州海牙字伯源高昌人因其祖也里爲袁州稅務大使  
遂爲宜春人海牙善屬文登至正五年進士授承事郎  
進賢縣達魯花赤興革利害茂著廉勤飾公宇新學舍  
爲士民仰戴弟中都海牙登至正二十年進士授教官  
郡守榮之於其門立坊曰聯桂載嘉定志

明

劉澤民字朝佐邃於經術能詞章洪武元年以賢才舉授  
縉雲知縣有政聲民稱劉父陞嘉興府同知載通志  
余寶字均玉任祁門知縣初各官廨及坊巷開新河爲橫  
梁以便民載江南通志

劉衢字嘉謨邃於經術嫻詞章爲文出入經史落筆驚人  
弱冠領鄉薦第九歷官常州通判揚州同知清廉不擾  
銳然以興學變俗爲己任所至多惠政公餘尤好與諸



生講學論文江左知名士多出其門祀名宦載前志

陳鐔字洪器少有抱負年五十餘始以歲貢入試雍闓中

天順己卯科應天鄉試庚辰會副初試南大理右評事

以忤時貴謫廣東恩州吏日後擢瀘州太守課士勸農

清勤自矢惟飲地方一杯水會天旱鐔率紳士日夜請

禱勞瘁特過以疾卒於官宦橐蕭然州人士斂金助其

子扶柩旋里載前志

龍夔字舜卿宏治庚戌進士授議制主事主客郎中陞太

平知府歷官克稱其職以疾致仕卒載前志

張鳳字應時成化辛丑進士授江浦知縣歷長樂內黃家

有政聲累陞廣西參政奉璽書掌思恩軍民府事時土

會爲亂至則斬其渠魁撫循其衆地方以靜轉南京大

僕少卿尋陞南京都察院右僉都御史提督操江改巡

撫蘇松三河盜起齊魯騷繹河運不安進右副都御史

巡撫山東兼理河道事平致仕卒於家載通志

彭澄字勉之其先安福人因父彥克始入本縣籍三膺額

貢官光祿寺署丞孝親忠君清平不阿卒於官載前志

彭夔字師舜號方洲彥克長孫宏治丙辰進士歷任禮工

兩部主事員外郎中福建參議廣西參政廣西左布政

使忠君愛國承流宣化有甘棠遺愛粵人頌之載前志



袁才字用之由邑廩生援例入監考授湖廣武岡同知拿獲山寇陞淮安泰州鹽運判時胥吏作弊才一一清理戶竈皆賴以安後與運使不協遂解組歸子業仲邑庠生業孔廣昌教諭業顏邑庠生入監授山東冠縣丞陞浙江義烏知縣載揚州志

袁業濂字觀所萬歷丙子舉人知四川開縣清廉耿介釐剔積弊民用不擾遷嘉定知州念母春秋高重違膝下移疾歸與弟業泗同侍母黃庭闈聚順時母壽百歲濂年八十斑爛戲舞人爭傳爲盛事載前志

朱志字元遠少負才名以貢選入監舉順天辛卯鄉試任

瀏陽知縣敦行節儉子婿來省一飯卽令歸如見胥吏有寬衣大袖者命當堂剪裁之着絲履者詈笞之微追問施鞭笞輒爲下泣任不滿三年懸印綬于堂棄官歸子六人俱以文學顯光裕光祺皆舉人載前志參長沙志

黃朝選字葵之號珂集萬歷舉人知湖廣隨州歲饑遇惠桂二王過境需繹夫六千名百姓多逃竄內相笞役酷朝選多方撫慰隨知惠州海寇猖獗守道洪紫雲巡道康麟定以劉賊強項難招徠議就其地撫之因盛設儀從命朝選往朝選執理爭之兩道悻悻自往中賊計擄



兩參將下船屍積無算洪被害康以罪誅人服朝選有  
先見甲子解組歸

袁一鰲字占梅號瞻慄萬歷己酉舉人授江山知縣調邵  
陽由南大理評事陞刑部主政以恤刑審決江南擢寶  
慶知府吏民悅服喜獎拔士類以忤岷藩解綬爲諸生  
才名冠多士知縣張本嘉獎借不置口兄弟七人一鰲  
居長友愛諸弟爲之婚教至成立姪克宥撫爲己子並  
撫愛諸姪盡情教育尤喜人勤學能文自服官行政守  
正不阿事治民安奏最稱職家居日以墳典圖書自怡  
悅以壽終載通志

梁應賜號赤心萬歷乙卯舉人爲人和易醇雅而操履清  
介課兒刻苦不倦辛未同男佳植銳志南宮子捷聞始  
筮仕樂陵士民帖服以循良著聲甲戌上計擢光祿署  
正卒於官弟應賜詳文苑傳子佳植另傳載前志

梁佳植字南有應賜子英資杰出崇正辛未進士令餘姚  
勤心催科撫字體緩而口緘默及鞫訟則屹然不可移  
錢穀久爲吏胥乾沒佳植至一洗積弊民輸將恐後未  
幾丁父艱歸里服闋起補建寧廉能有聲擢容臺歷官  
廣西提學副使致政後遇浚李渠修秀江橋有禊於郡  
邑者悉畱心焉時守令欽其德舉鄉飲大賓載府志參



浙江志

劉訓字北川由監生授廣東新州吏目冰兢自勵勤敏供職時海寇侵疆隨易副使可久督有功陞本州判廉明有聲罷官居鄉布衣蔬食課子最嚴子相貴歲貢生相臣邑廩生俱有文名載前志

皇清

陳之龍號去亢天啟辛酉舉人明敏英達有文武才初任常德司理風采卓然歷牧乾州同知西安銳意當世聲望大著遂監賀軍治兵關內順治乙酉擢授巡撫廬鳳淮陽等處地方都察院右僉都御史公至加意拊循威

惠並至後以疾歸鍵戶著述課子數留意地方如汰浮糧輯郡志等事尤卓卓云卒於家所著有甓湖小草偶驗諸集祀鄉賢載通志

潘師質字子方士聞子順治丙戌舉人性敏嗜古爲文瀟灑放逸絕無統絢態留心時務

國初有戊卒毀文筆峯師質合力争復嘗輯郡乘汰浮糧修秀江橋劬勤任勞辛丑知嘉定縣官舍蕭然日食粗糲時邑蠹導衛弁爲奸索額外加漕耗若干師質置不應會民毆擊其爲首者致殞憲府檄詰其事師質自投秦淮河死而以書繫臂極言衛弁加耗之害百姓聞者



無不感泣載前志參江南志

潘于遠字鴻友生有異徵讀書挾奧旨身體力行弱冠食  
餼郡庠樹幟春麓社順治甲午提學趙矢志務羅真才  
拔冠貢選充官學教習以嚴憚著聞滿漢司成咸異之  
超除蘇州通判以清勤見重於巡方許公試以繁劇發  
疑事凡三千七百有奇傳餐秉燭彌月而訖悉得情巡  
方益服其才蘇州國儲甲天下徵解往往遲誤撫軍韓  
檄委親徵勸誘不兩月八州邑皆足額得先期抵淮河  
督朱耑委兼督又先期至通方紀叙超擢以會審案牽  
左遷河南理問攝陳畱篆邑大水遍歷阡陌相度捍禦

邑舊苦銅觔柳梢請於上減之民皆尸祝擢建寧同知  
以母憂歸宦橐蕭然布衣蔬食泊如也家居時于地方  
事如修秀江橋昌黎祠纂輯邑乘皆直任之郡邑咸相  
敬信性至孝親在捧檄服闋不起生平嚴正不阿寡言  
笑到處以清節著聲壽七十一終載府志參前志

張潛字二見由貢監生任廣西西林縣丞撫循有方署思  
恩通判吳逆犯順遂掛冠歸簡親王奉命督師進勦招  
四方智略之士潛毅然應之運籌決勝以功授湖廣攸  
縣知縣時龍馬交馳軍需孔亟潛為調劑有方六年以  
父憂去任士民扳轅號泣鑄有與人誦去思吟家居偕



弟洪泳奉母多歡母卒居喪盡哀遂不出晚年益好施濟無疾而逝年七十子國標國權俱監生國柱郡庠生  
載府志參前志

袁起濤字學淳父振翰郡增生好緩急人家中落起濤年十七補邑庠三十餘年以館穀奉親爲二弟立家室後以進士授太平知縣邑積逋賦盈萬廉得奸胥侵欺弊追征不重累民丙午歲歉力爲民請命辦賑俱沾實惠丁內艱補洛陽知縣下車雪冤獄十餘案引年致仕爲文章有法度著有尚友軒集行世以子芳杏官撫寧知縣贈文林郎載府志

袁芳名字聲遠歲貢生任蓮花廳訓導廳屬新設芳名倡建學宮明倫堂造祭器創學署整躬率物士服其教以年老致仕載府志

黃在中字公瓚少岐嶷家貧每執書就鄰師請業師愛其才日飯之旋補庠生甲辰成進士授雞澤知縣廉明有聲邑有支河秋汛驟發在中率民防堵數十晝夜露處水不爲害上官稱其能丁內外艱繼補璧山令益詣吏治建義學捐置學田其治以愛民爲本有古循良風年老乞歸諸弟姪故貧悉爲置產成室鄉人咸服其友愛  
載府志



施士昌字繁安性孝友精明勇幹任本府協標把總調萬載適黎源溫元貴叛士昌率兵勦捕奮勇追擊元貴奔竄鄰境被獲邑賴以安閣學辛從益紀其事詳藝文張標字麟侯偉儀容有幹略由武庠生授千總領運浙省陞白糧幫守備因奸丁構釁降秩事白擢陝西撫標右營都司標居職雅歌投壺有風致鄉先輩如帥方伯念祖陳倉督守劄朱文端軾交相器重解組終養遂不出年六十卒

施士超字元璞狀貌魁梧多才智由把總爲右哨千總鐫秩遊廣東會劇寇猖獗士超應募往捕冒鋒殲其魁指撫數百人論功陞潮州守備遷雷州都司雷三面距海溪峒獠獍不時竊發士超輸誠撫輯民多鬻子者爲捐錢代贖抵萬安適黎人滋事改擢潮州中營往討之黎人聞風匍伏待罪潮故有海隄當事多畏難築乃詳請修理工竣各憲交薦題陞惠州將未赴任卒

袁芳松字友鶴號筠齋雍正己酉舉人歷官大理寺正卿器宇端凝局度春容自弱冠筮仕京師五十餘年半居西曹清潔自矢辦理刑獄詳慎平允案牘無冤處世謙和人服其量有名相風規咸以佛爺稱之餘詳新建熊爲霖傳中列藝文



梁日華字尹惟佳植曾孫幼端重嗜學十八歲入縣學食餼肄業豫章書院有文名乾隆戊午舉於鄉大挑一等分發山東委辦荏平災經畫有方以繼母姚請養改教職授東鄉訓導年六十四卒於官生平敦友道不立崖岸律已嚴待人恕歷遊幕府所至以品學著聲分宜林有席爲之傳

彭維舉字簡升美丰儀聰穎異常早失怙恃隨兄廩生宏譽學幼卽能文年十六籍邑庠踰年食餼二十九舉于鄉癸未試禮部呈薦以策內微疵致擯壬辰大挑分發河南歷署知縣政績有聲百姓製繳綴茗贈行在鹿邑

雪冤獄士民稱神去時遮留溢道紳士呂大律等爲序餞行補新安十載稱廉吏爲同考官薦拔多知名士辦理河工精勤報最以軍功陞山東平度州未赴任因積勞成疾卒於官子六汝泉監生孫森炳郡庠生

劉師殷字重器自幼湛深經術學有根柢名噪一時庚寅殿鄉榜主司重其文屢應禮部試薦而不售家徒四壁惟飲酒觀書不爲貧累大挑分發江南初署潛山繼補繁昌政簡刑清案牘之暇手一卷不釋上憲雅重之擬

趙擢旋以病卒於任宦橐蕭然子九人洪勳郡庠生張見龍字躍雲弱冠入邑庠家貧不事父嚴責之發憤



入都遇鄉紳薦入藩邸甚洽由天文生考取 恩監任  
長洲主簿遷南城兵馬司吏目有才調得諸上官意以  
老致仕歸掌教宜陽書院數年沒子鳴岡副貢生

李觀瀾字虛受祖自龍父占元世守貞誠觀瀾安貧篤學  
兄宗縉爲經理家事俾得潛心學業作文渾灑流轉得  
蘇長公筆意志豪邁恒以經濟自任乾隆壬子舉於鄉  
大挑分發山東署嘉祥縣治東接濟汶支流不時淤塞  
蒞任初奉委疏鑿身親董勸民用和集六閱月告竣糧  
艘稱便歷署淄川青城壽光俱以勤慎見稱課試生童  
嚴夫取拔前列者多知名士簿書之暇手不釋卷卒年

六十有九宦橐蕭然同郡閣學辛從益任山東學政輓  
帖云身現宰官非臘仕澤遺孫子有清風爲紀其實云  
孫傳恭傳寬俱庠生



理學

唐

袁皓字退山博學工著述咸通六年登進士第由當陽縣令擢撫吉二州刺史有治聲龍紀元年進禮部侍郎兼集賢殿圖書使知翰林院制誥出採訪圖書使二年赴闕卒著碧池書三十卷俱根心性大旨自成一家言號碧池處士學者宗之又著興元聖功錄三卷見唐書藝文志載通志參唐詩紀事

宋

彭俞字濟川少隱集雲峰學邃於易自號連山子每以正



學爲務紹聖四年進士知溧陽縣理冤獄甚多監司連薦之稍遷至朝散郎著有君子傳三卷循吏龜鑑十二卷貫通篇五卷時議二卷文集二百卷載通志餘詳藝文自志

鄭銓字應權學通六經工大字長於詩宣和間兩貢上舍不偶棄歸學者踵門日衆建炎三年金人犯江西銓上書知州事王仲巖言時事責其守城著排姦黨說極論崇寧人才之弊年八十卒又嘗自號應菴學者稱應菴先生載府志

明

劉廸字學邃於易詩春秋吳元年徵入京授尙賓館副使陳時務五十條及進皇王大學通旨奉詔使交趾至南寧道卒崇祀鄉賢著有尙賓集孫衢另有傳載府志

袁業韶號石洲性嚴正淹貫經史著有修齊正矩性理說約諸書皆闡發先儒奧旨萍鄉進士吳三益序弟業泗授梓嘉靖乙卯隆慶丁卯兩中乙選乙未督學吳從憲拔爲第一以年老辭不就餽從學多知名士如潘世燧懋舉李慶芳名臣名卿黎文輝梁士翼袁若璟業濂業泗業汾業渠朝陽林有鴻輩雖仕後省視猶循執弟子禮子三喬登邑廩生詳處士傳繼虹邑庠生孫枝繁衍



科第仕宦振振以孫一鰲貴贈朝議大夫載袁業泗墓誌參芑山集

陳巽言字汝說嘉靖丙午舉人博物洽聞教諭宜興轉上杭知縣端重不阿轉維摩知州告養生平孝友廉靜寡慾講學以性命爲宗以致良知爲主士多師之著有陽明先生摘要一卷載通志

袁一唯字嗣魯邑廩生博極羣書以教育英才爲已任一時出其門者皆卓犖有聲爲文宗古大家尤精於性理語錄諸學其力排釋氏功不在昌黎伯下臨事正言讜論不阿所好專毛詩學刻有詩經摘義行世其他著述

甚當年逾四十賫志以沒子克生好學工詩文載前志劉世華字斂之歲貢生父光祖積學力行世推重之世華秉姿穎異稍長卽博極羣書文章質古簡奧不屑時趨天啟辛酉南昌知縣劉夢潮得卷首薦必置之第一人忤主司意遂中副車生平剛介砥礪名節其學崑以立誠主敬窮理格物爲功士多宗之著有易經祕旨芝房雜藁異學辨諸書皆爲後學津梁至倡修興賢文昌等閣均爲有功儒林云載前志

皇清

張自烈字爾公號芑山性鯁介勵行積學爲文高古由邑



廩生入監屢冠多士名震一時晚自號芑山咸稱爲芑山先生自烈亦毅然以守先待後爲己任歷主講席其校讐藝林尤極謹嚴屢膺辟薦俱辭弗就謝賓客閉戶著書寢食不遑至老無倦容著述甚富得力在大極圖說西銘諸篇僑寓廬山五老峰下主講白鹿書院士爭師之卒年七十一歲南康知府廖文英與自烈爲性命交葬於洞左青龍山題其碣曰清故處士張芑山之墓載通志府志

袁一菁字次莪魯訓六世孫生而英敏博極羣書通性理周易於所治麟經尤多辨析疑義爲文嶽崎磊落自成

一家言順治庚子魁于鄉闈墨傳播海內爲人端方嚴正以古人自期家居三十年環堵蕭然日與族人倡明正學排斥佛老講究天人性命之旨晚年授山西岳陽知縣未任而卒子克韶克韻俱邑庠生載府志

張自勳字不競端方醇樸力敦孝友重然諾慎取予博極羣書爲文獨出機杼自成一家言幼補邑庠生有聲于時思以經術經世未獲用遂隱居礪行潛心理學其學以求放心爲本謂心統性情心正則罔不正而正心必先寡欲寡欲必先集義所釐正諸書悉明道辨惑足發前人所未及生平多隱德樸行不求於世世亦鮮有知



者施觀察閏章數與講學昌黎鷺洲書院剖析疑義推服無間言與兄自烈同評房刻各集及綱目續麟卓菴心書行世餘四書衆解合糾五經大全正誤廿一史獨斷朱陸折衷等稿尙藏于家自號卓菴與芑山齊名學者咸稱誦弗諼云載前志

易尙行字公勉嘉男之子歲貢生負姿穎異制行端方不求聞達惟潛心理學闡發程朱語錄及大全蒙存淺達等書著有四書周易講義藏于家載前志

張世竣字天極博學多才倡明正道以繼述爲志童年應試卽爲督學邵首拔丁卯舉于鄉與弟邑庠生世璣共相切劘居鄉恂恂挹其光者如飲醇醪家貧饘粥講學集雲鄉盤龍寺嚴寒盛暑不輟其學以存心養性事天立命爲務著有春秋祕旨性理纂要諸書晚號淡然癸未除夕沐浴端坐而逝士林惜之載府志參前志



本朝文苑名流坐而談士林於文苑志  
 立命於茲昔有春煉煉目世世其是  
 葉連帳盤前手照寒盤善不輝其學  
 味以融其德其其其其其其其其其其

儒林

唐

彭景直中宗景龍中仕禮部侍郎蘇頌草其制曰通理內  
 融合輝外靜文尚典雅學務專精載宋史

按歐陽圭齋集載景直構雲之父豫章十代文獻畧註  
 為袁州宜春人與宋史所載河間有異第構雲既隸宜  
 春而其父又居河間恐有悞茲因通志府志未載特補  
 附於此

盧文秀肇子咸通六年登進士第仕宏文館學士父名噪  
 一時豪氣逼人文秀謙謹居館閣不事聲華人謂肇有



令子云載前志

宋

李士安字永和以特奏同學究出身爲人不妄喜怒屢爲州牧後請老得養生之術視聽不衰年九十七卒官至朝奉大夫載府志

張瑄字子律少從學邴元鼎熟於典故尤工五言詩歷官州縣以材諳稱立朝靖重不苟守嘉興卒上念之加直祕閣瑄平居不事生產仕至二千石喪歸貧無廬其清約如此然勇於爲義周人之急未嘗以匱乏辭子嗣古詳文苑傳載府志

夏執中字子權孝宗皇后弟初補承信郎閣門祇候遷右武郎閣門宣贊舍人初后去家時協已亾執中貧甚及后物色得之攜其妻入京或諷使出而別婚貴族執中不應一日后親與之語執中誦宋宏事以對后默然執中旣貴卽始從師學作大字頗工復善騎射孝宗聞其才將召用之謝曰他日無累陛下保全足矣人以此益賢之官至奉國軍節度使提舉萬壽觀封宜春郡公寧宗卽位加少保卒贈太師載宋史參綱目

明

袁魯訓字宗道邇臣裔孫生而穎異清高自守工詩會賦



正德縣志卷之三  
三  
桃花馬見志分宜知縣大奇之成化丙戌成進士授東陽知縣蒲鞭不事丁外艱服闋補蒙城豈弟慈祥擢北行人司正時汪直萬安輩專橫魯訓雅志解組適同年羅倫以論李賢見謫遂歎曰直道不容如此哉乃慕五柳高風終老和樂園植六柳以自娛號六柳居士山居十餘年不入公門有司罕見其面門人都御史張鳳傳其行載通志

郭紳字廷章成化進士授寧海知縣紳蒞任首刻方正學集創祠祀之擢監察御史巡按雲南歷陞貴州參政福建布政使太僕寺卿至南京刑部右侍郎卒紳器宇凝重雖歷崇顯而居鄉待人寬厚簡樸有長者風子叙正德進士歷官貴州參議好學工詩載府志

按明史紳與太倉姜龍甫田林俊俱官滇鄧川州人爲立三正人祠祀之

蕭義字宜之成化進士授吏部稽勲主事卒義操履端方問學典實文詞雅暢袁士多師之所著有葵菴集載府志

郭敘紳之子正德丁丑進士歷官按察司參議好學工詩賦無貴游氣息所謂鐵中錚錚者居官所至有琴鶴操不忝乃父之聲惜其詩詞盈篋而少流播載前志



宜春縣志 卷三  
朱鑾少浮沉里中不事生業年三十二見諸生學心慕之始挾冊入鄉塾昕夕咕嚕忘倦里諺曰朱落拓三十二歲讀太學後由鄉學升國子監中京闈舉人任徐聞知縣純實方確有古風鄉黨尤稱其孝載前志

陳宜慶號陽羨巽言子歲貢生綱正博洽有古君子風廷試第一授清江訓導陞靖安教諭師範嚴整却諸生贊稽古高尚家居北郭雖近城市不染囂塵學者稱爲吉亭先生載前志

朱任字子重歲貢生爲人高潔疏宕嘗自矢以聖賢可師侍父疾三月不解衣後任進賢訓導身率諸士砥礪廉恥未幾致仕諸生自督學固留至欲立碑志思焉生平不治貲蕭然懸罄人以重金請輒却之往往以詩文見志云載府志

楊以正字吉夫嘉靖丁酉舉人博學工古文辭居母喪不就內榻者三年性剛介寡諧晚號大仰山人尤砥礪名節雖屢困吟誦自如不仕卒知府劉錄其行爲文哀之著仰山藁藏于家載府志

袁業汾字逝斯繼咸父勤學篤行閉戶潛修課兒不涉俗務乙丑繼咸成進士業汾年逾六十始貢於鄉遂日與諸耆老爲洛社之遊者二十餘年繼咸迎養江州僅兩



月卽歸丙戌繼成死節燕市泫然沛涕曰取義成仁夫  
復何憾卒年八十六元配周同甲子生卒年九十有九  
詳壽母傳載前志

徐士達字汝上天性孝友遇物溫和子弟有不率者告誡  
罔倦如遇貧乏輒解推拯之由庠生入監不樂仕進隱  
居課子克承先志載前志

袁繼芹字心魯少遊黌庠以孝著人有急推解以濟齋居  
樂善律已甚嚴雖處市門嚼然不滓也年七十一而卒  
載前志

錢經濟字駿伯少穎異好學淹貫經史百家言天啟甲子  
鄉薦闈墨一時紙貴癸未中會副隨授大理府推官未  
任而卒爲人醇厚端謹與弟仲偉孝友篤於天性終其  
身不異居人甚賢之載前志

袁繼樟字拙若業泗長子拔貢生性厚重能詩嘗游金陵  
維揚恣意山水間學益進郡推官王延禠器重之每與  
周諮地方利弊如清四差革幫解禁里甲克夫馬經收  
佐益爲多癸巳疾篤惟以未得終母養爲恨云載府志  
朱光祺字資賢端謹嚴重遭郡多故祺條議戰守激揚忠  
義上書潯督語極憤切後教授萬山中疾革正襟而卒  
載前志



袁一芝字幼馨恩選貢生貫穿百家文成翻水試輒冠軍  
督學蔡雲怡侯廣成嘗器重之爲人堅凝厚重絕遠榮  
利性喜獎誘後進屢困場屋晚年笑傲煙霞手不釋卷  
訓三子皆著聲譽序載前志

張自熙字惟適自烈仲弟與其季自勳並以學行名當時  
爲邑庠生憫邑民凋瘵條六款白御史臺中如飛報馬  
停酒戶尤關利病邑猾范某用賂煽讒枉自烈加派冀  
格熙議不行邑紳惑焉牴牾前議烈抗爭得直已御史  
臺采輿論釐正勒石著爲例里中竊嘆熙仁言利溥云  
丁丑冬臨藍賊掠袁殺范氏父子熙闔室晏如郡邑喜  
曰天祥張氏篤哉癸未袁復陷寇自熙罵賊死父曰柱  
亦死之載府志

皇清

袁士瑋字席珍博聞強記善屬文試輒優等順治庚子歲  
貢試禮部第一爲人醇謹謙厚持行端方里中推爲長  
者臨選訓導而卒載前志

楊嘉材字其丹郡廩生幼敏能文性孝友博學篤行才優  
經濟縉紳先生深器之遇有關地方事皆從商確汰糧  
一舉與有勞焉知府吳嘗稱其慷慨赴義九試鎖闈未  
遇識者惜之著有燼餘草螺山集詩文四卷載前志



陳灝字于正之龍子性溫厚博聞強記善屬文尤工詩早  
隨中丞宦遊淮揚有聲順治四年入直侍衛例授京秩  
力辭終養辛卯選貢以有違膝下不樂進取爲人端方  
恬靜布衣蔬食無豪貴態孝友無間言恂恂守默望而  
知爲長者訂有四傑詩選行世載前志

袁繼祥字勝之業泗次子少敏於學督學侯廣成拔冠軍  
貢選入京壬午北闈副榜順治丁酉復由庠生中鄉試  
甲辰成進士嘗從施愚山講學於青原白鷺間又勦力  
重葺昌黎書院力增科舉及修秀江石梁橫塘義倉克  
承先志生平孝友喜談論美丰儀欵洽勤懇同人咸欣  
慕之遇公事知無不言言無不盡如汰浮糧辦遠衛將  
以經術飾吏治庚戌謁選卒于京邸惜未竟其用子一  
煊貢監生循謹而文一焜邑庠生載府志

陳涇字源長之龍季子邑廩生質直醇樸孝友性成雖居  
貴介謙卑自牧潛心學問甘貧好義不屑計錢穀爲文  
清折宕逸多所發明常講學於青原山癸卯壬子薦而  
不售湖西道施知府李咸推重之惜年僅四十而卒載  
前志

林燦字叔昭拔貢生善承庭訓淹洽而文孝友醇謹下筆  
千餘言不竭咸稱爲倚馬才屏跡公庭士大夫悉器重



之惜齋志以逝附載前志

楊文周字子京聰穎過人日誦數千言不忘年十三卽入  
邑庠潛心道學爲文獨抒性靈尤工詩賦講學於吉南  
諸郡從遊悉名雋生平廉介謹嚴足不履公庭遭世多  
故絕意進取遯跡西溪著有爐餘草四知家譜若干卷  
卒年八十一子嘉森好古而達孫耀郡庠生載前志

楊尙義字質卿以誠齋父縈廩生早卒尙義甫八歲母嚴  
氏年二十三柏舟矢志教之有文譽甲午舉于鄉尤涉  
獵經史至老不倦癸酉任浙江宣平知縣甫朞月輒解  
組歸爲人沉靜簡默有古人風縉紳重之載前志

李京字高叔歲貢生強記多聞修身勵行接賓友動循禮  
法爲文醇而肆奇而正每試輒高等與伯兄素才名相  
頡頏崇正癸未罹左兵難頭被數創幾斃賴匿屍中獲  
全子從時府廩生工詩文載前志

袁世琦字奇奇號爻岫一鰲孫性孝友純雅恬澹學有淵  
源爲文儵然絕塵與其族子尙燕皇等皆以髫年遊泮  
爲督學蔡雲怡所賞識每試拔前茅應丁亥歲貢以二  
親年老不圖進取朝夕侍養定省之暇日偕諸賢士相  
砥礪清介自持雖蓬戶蔬食晏如也親沒避囂南庄杜  
門四十載每爲當事引重家居手不釋卷詩文自娛凡



宜春縣志 卷三  
諸史百家及天文地志靡不殫究晚證慧業超然世外  
年七十無病而終載前志

潘士斗字維樞子達次子八歲能文稍長食餼郡庠以祖  
父家學有源益潛心程朱之學康熙癸卯以麟經魁江  
右時年未及壯都人士艷稱之爲人磊落謙和敦孝友  
尚氣節無貴介習氣嘗語昆弟曰平生志不在溫飽王  
沂公真我同心其卓然自命如此公車抱病南還賞志  
而沒載前志

袁一颺字扶上繼樟子力行孝弟殫心理學于先賢語錄  
洞窺其奧爲古今文筆妙一世詩多警句每見知於郡  
邑大夫凡地方公事毋巨細悉咨之如輯郡乘修秀江  
石梁請命蠲荒皆有成勞爲人犯而不校溫雅和厚人  
皆樂與之遊施愚山講學于袁吉之間甚器之壬子登  
文行兼優科年未五十以疾終載前志

朱光裔字季賢邑廩生性耿介手不釋卷性理諸書無不  
探究於麟經尤融會貫串時爲春秋名家借諸同志會  
文講學服其教者歷久猶追慕不置載前志

劉而寅字泰茹博洽能文卅角時督學蔡雲怡卽器重之  
屢拔冠軍文章離奇天矯有韓潮蘇海之勢爲人醇謹  
端方尤不愧古君子云載前志



陳舜道字升聞之龍孫早慧有文名爲督學李拔取食餼  
同叔父涇講學青原又爲施愚山所器重貢入國子監  
以母老絕意仕進居家敦倫植紀庭訓義方子喆昌郡  
廩生林昌邑庠生載前志

劉而實字稗木少承家學博通經史爲文雄視一世與弟  
而寬而寅而寵俱擅名庠序性剛正言動不苟尤篤孝  
友會獻賊陷城捐妻子負母逃遇賊以身翼母臂傷兩  
刃弗顧惟痛哭求無傷母賊義釋之執父喪居廬三年  
母病七閱月卧不就枕籲天請以身代三弟去世鞠諸  
孤七人婚嫁一出其力絕意仕進匡坐一室研窮天人

性命之理闢佛老衛正道著書立說豁然有得生平不  
治貨然好拯人急里黨中貧不能婚葬者悉玉成之有  
同族乘亂盜賣其宅者著弗校邑人服其古道壬子舉  
鄉飲辭不就郡侯李強起之輒謝不往壽七十八卒所  
著有性理集要周易參同契註釋周禮各若干卷子冠  
英見別傳載前志

袁一蓀字石友應龍孫邑廩生幼失怙奉祖母及母曲意  
承權以孝聞生平溫厚和易篤學好古淹洽經史百家  
爲文得力於唐宋先正不屑寄人籬下工著述輯有四  
書講義於先儒多所發明誘迪後進名雋咸出其門屢



困棘闈當歲貢辭不就衡泌自樂有義方之訓子二克  
綱另傳克紳屢冠郡學癸未歲貢生任安福訓導胞弟  
庠生一蕙乏嗣以克紳繼其後孫八人振轅振麟振轍  
振輶振駟振輔俱遊庠序載前志

陳憲道郡廩生入監考授縣丞持身孝友內外無間言尤  
謹取與端方耿介雖居城市足不至公庭郡守李常器  
重之子盛昌弱冠入縣庠載前志

廖璜字石友好讀書博通典故與弟璵並著聲譽序路拾  
遺金召其人還之知府李延入西席盡心講藝李益器  
重之領丁卯歲貢終其身其子宜振字穀貽承庭訓屢

寇多士八試棘闈幾得復失馬中丞講學豫章召之以  
親老不赴甫及貢賞志以沒兩世奇才士林稱之載府  
志

廖璵字石雋幼聰穎日誦數千言稍長善屬文汪洋豪宕  
援筆立就與兄璜同擅才名試輒冠軍性孝友奉母善  
承歡工詩詞書畫時多稱之惜臨貢而卒載前志

袁克綱字士勉邑廩生性仁慈善事繼母篤同氣博通今  
古爲文獨抒性靈風味雋永受知於督學何涵齋試輒  
拔前茅生平足不履公庭惟閉戶潛修工著述輯有五  
經纂要釋註定本學者宗之甫及歲貢而卒子振轅振



轍俱邑庠生載前志

劉士基字子開郡廩生博覽羣書每遇一題輒作數藝多  
 妙理名言屢試冠軍為知府李知縣陸所器重潛心纂  
 述不事干謁一時從遊多名士輯有易經講義載前志  
 袁克贊字維周邑廩生少失怙能勤苦自立篤學不倦文  
 詞昌明博瞻有名大家風味督學聞其學品多以國士  
 待之蒲城王孝齋獎借尤甚聘取豫章肄業時召署內  
 講究天人性命之旨克贊性嚴正遇事侃直敢言尤喜  
 訓迪來學凡郡邑子弟質疑問難受益者咸膺拔擢登  
 科第人稱子貞先生年四十四臨貢而卒子振錄邑庠

生振銜邑廩生學行兼優克紹家聲亦惜早卒載宋希

陳墓誌參前志

袁振烈字昆佑邑廩生負才奇偉屢試前列為文醇雅名  
 貴有歸胡遺範潛心理學于四子書多所發明居鄉敦  
 實行不履公庭祇礪廉隅一介不苟取與法言篤論足  
 使狡偽者獻誠暴慢者致恭惜癸未當歲貢而卒子起  
 煥邑庠生載前志

易之泰字舒君雍正甲辰舉人天姿穎異展卷默識不事  
 咕嗶歷久不怠師事邑進士袁起濤文有鄉先正遺風  
 掌教昌黎書院遊其門者多以文行見稱壬子應聘楚



闡三上春官屢薦勿售遂絕意功名杜門著述己巳部  
檄趨赴選不就生平純明雅正喜怒不形年七十二卒  
著有正家善俗訂頑覺夢諸書載府志

李如槐字公兆安貧篤學以歲貢生官定南訓導每爲諸  
生講義利之辨課文黜浮華以清雅爲宗士樂就之任  
滿歸卒載府志

陳默昌字代高邑增生博聞強識工詩文尤潛心學問知  
府薄履青深器重之居族正有年品學兼優

袁起炯字輝遠乾隆丁卯與兄起炳同科副榜庚午舉人  
生平孝友無虧品學兼優足跡不入公庭惟以課士卒

業郡邑英俊多出其門庚寅舉鄉飲賓知縣侯廷柏額  
以碩德紹先子芳桃邑廩生

陳然昌字天然邑庠生年十三失怙兄勲昌教育成之爲  
人謙和足不履公庭遇不能婚葬者多贊助之郡邑推  
重其品

劉今隆字邳軒性醇樸立品端方好學不倦弱冠入邑庠  
旋食餽甲申歲貢垂訓遠方門下獲雋者多乾隆丁酉  
臨選訓導辭不就卒年八十二長孫孫謀舉鄉飲

袁起宇字肯堂乾隆辛卯舉人品行端方文章雅贍自弱  
冠登科數十年未嘗一足履公庭司鐸長寧高安勤于



訓課克供厥職在高安倡修學宮尤得士心後選知縣  
辭不就卒年七十三歲子二芳侗從九品芳价郡廩生  
徐鈞少聰穎博涉經史爲文洋洋灑灑不傍人籬落手寫  
五經註疏及百家諸子盛寒暑不輟屢躋童場志不少  
衰教二子口講指畫每日讀書宜求有本之學能取科  
甲固可致用卽不然聖經賢傳立身行己之道具在兒  
等勉之年五十三卒 贈文林郎子輔仁歲貢生輔忠  
進士現任南漳知縣孫曾遊泮者四人

陳希坊字紀庸邑優增生幼孤聽母訓無違秉性和平言  
行不苟工舉業尤精於詩兄弟共相切磋磋誘教貧士不  
計束脩知縣陳椿年知府李允性深器之著有百尺樓  
詩鈔子廷銓拔貢生考授縣丞

晏梅字占春歲貢生幼失怙恃貧苦力學能自得師籍諸  
生藉藉有聲植品甚嚴從不與城市事人亦不敢以非  
禮干之設教多年成就者衆年六十六無病而卒子際  
煌副貢生

謝煬邑庠生性嗜學督學張科試置高等生平品行端方  
不趨豪門不履訟庭正直孝友可型鄉里

易中芳字書田郡庠生賦質聰穎爲文湛深經術知府李  
署縣莊皆優禮之尤爲督學趙鹿泉所賞識生平孝友



宜興縣志 卷三  
廉謹不立崖岸人亦不致以非義干之正韓子所謂文  
與行不失其世守者沒後壻周德潤爲之誌其墓  
易煥謙字熙周邑庠生秉姿英敏爲文清新俊拔試輒冠  
軍植品正直然諾不苟郡邑修建及鄉里族黨鉅務悉  
信任之調置得宜待人極慈厚多恤貧困妻弟彭堉五  
病革托孤攜至家教育如己子時母熊氏年八十八歲  
見而喜曰爾若此何異程嬰之於趙武乎謙年六十時  
教授周國瑛爲教其懿行年七十一臨卒囑子捐田以  
益宜陽書院膏火子五在恢在愷俱監生餘業儒

文苑

唐

鄭史字惟直開成元年進士第爲易學博士歷官永州刺  
史有賦百篇亡又有詩十二首見宜陽集子二啟有詩  
見全唐詩谷另有傳載府志

盧肇字子發幼好學穎拔不羣邑令盧萼一見奇之曰子  
異日有聞乎由是愈激厲會昌三年擢進士第一唐制  
取士許兼獻所業先察其素時侍郎王起知貢舉肇爲  
書以獻起問曰鄉薦如公材幾何對曰皆才選也未易  
品判然如肇者亦猶沅江之鱉九肋實希繼而同舉黃



頗進謁起問如初則曰捨頗其誰才起由是少頗而多  
肇之謙始李德裕謫州長史嘉肇文行異禮之至是德  
裕已進用遷太尉總樞柄絕朋黨晚進寒素難遊其門  
獨肇入謁常許袍帶從容談論既試有期知舉以取士  
雖受白亦舊例也德裕曰某不薦人然喜金榜得一狀  
元矣論者謂肇雖因德裕之薦而不妨主司之公道也  
初任著作郎遷京兆府司錄使相太尉裴休左僕射盧  
簡求先後奏辟從事稍遷著作郎除倉部員外郎寬集  
賢院學士進朝散大夫持節歙州諸軍事柱國歙州刺  
史肇于是觀日月之運察盈虛之理爲海潮賦上之詔  
褒諭宜附史館移真宣池三州所至皆有可紀遷吉州  
刺史卒所著有文標等集子文秀詳儒林傳載摭言瑣  
言參洪武圖志

黃頗字無頗好爲洪奧文章蹉跎一十三載韓愈爲州刺  
史頗師之遂大振與盧肇齊名素不相下每見肇爲碑  
文則唾之而去會昌三年肇狀元及第頗亦登進士第  
官至監察御史有文千篇行於世載摭言

按語林盧肇黃頗同遊李衛公門下王起再知貢舉訪  
二人之能或曰肇有文學黃能詩起遂以盧爲狀元黃  
第三人攷玉泉子以姚鵠爲第三人與此不合



易重字鼎臣會昌五年登張瀆榜進士第二會有詔試黜瀆以重第一官至大理評事著文千餘篇今亾子贊仕南唐雄州刺史贊子延慶詳孝友傳載通志

鄭谷字守愚穎悟絕倫七歲能詩司空圖嘗與其父史同院見谷奇之司空拊其背曰當爲一代風騷主光啟三年登進士第始爲京兆府鄠縣尉後爲拾遺補闕乾寧四年以都官郎中退居於仰山東莊之書堂以卒谷詩清婉明白爲薛能李頻所稱僧齊己有詩名以詩謁谷有自封修藥院別下著詩牀之句谷曰善則善矣有一字未安數日復至改云別掃著僧牀谷嘉賞結爲詩友

齊己早梅詩云前村深雪裏昨夜數枝開谷曰數枝非早也未若一枝齊己不覺設拜自是士林呼爲一字師谷始登第與許棠任濤張蠙李栖遠等十人同有聲謂之十哲而谷尤以吟詠顯有詩四百篇嘗從僖宗登三峯朝謁之暇寓止雲臺道舍自編其集三卷曰雲臺編傳於世其詠鷓鴣詩尤工號鄭鷓鴣載通志

楊夔有雋才與殷文圭杜荀鶴康駢一作駢夏侯淑王希羽等爲宣州日顧上客夔知顧不足抗太祖著溺賦數百言以戒之顧不用竟至於敗夔有紀梁公對原晉亂說當時爭傳其文載十國春秋



按宋嘉定志載唐人姓名止有詩見於宜陽集及登第  
年甲互見於題名記者凡五十七人並未載明縣屬今  
依其編次概爲補注其無考者姑仍其闕文獻畧云宋  
廸以下五十七人通志概不采錄袁志亦空記姓名毫  
無事實然以予考之嘉定志猶多遺佚如彭茲彭倜皆  
有登第年甲可考潘唐潘爲皆有詩見志此外見於當  
時名公詩集有姓與名俱全者如李嘉祐送張觀歸袁  
州曹鄴送曾德邁歸寧宜春是也有有姓而佚其名者  
如羅隱題袁溪張逸人所居韋莊題袁州謝秀才所居  
是也有姓與名俱佚者如張喬紀唐夫送友人歸宜春  
是也文物風流於今猶可想見太平寰宇記謂宜春山  
水秀麗鍾於詞人自唐有舉場登科者實繁江南諸郡  
俱不及之有宜陽集以載其名姓矣至宋羅誘又作宜  
春傳信錄三卷上卷序前世之事自陳景公始中下二  
卷述當代之事自王冀公始與夫守令之治狀過往之  
遺迹僧道之高行山川之靈異皆附於錄今宜陽集旣  
無可考傳信亦祇存數條說郛中惜未得與錄嘉定志  
參觀而損益之也然宜陽一郡文獻得劉松經始於前  
羅誘網羅於後庶幾猶爲完備不可謂非好事也而羅  
誘姓名乃復不著於通志惜哉



宋迪 登第詳選舉志全

錢識 登第詳選舉志

賈暮 登第詳選舉志全

謝萇

謝防 登第詳選舉志

楊鴻 登第詳選舉志全

楊夔 集五卷元書十卷元餘集一卷事實據十國春秋補全唐文有文二卷全唐詩有詩十二首鄭

谷贈詩三首 稱夔處士

易思 一作偃全唐詩有詩二首 嘉定志載處士有詩四首

易之武 登第詳選舉志

魯受 登第詳選舉志 石乳洞有記

潘圖 全唐詩有詩一首嘉定志載舉人 有詩一首盧肇有送圖歸宜春詩

徐煥 一作渙登第詳選舉志事實據三水小牘補鄭 谷有送渙南歸詩稱端公考國史補御史相稱

為端公

趙拙

梁燭 伊璠鄭谷張喬俱有贈詩

伊璠 登第詳選舉志事實據闕 史補全唐詩有詩一首

武灌 攷全唐詩有武灌 非灌益陽令有詩 劉溫其 嘉定志載禮部 郎中有詩一首

黎球 豫章十代文獻畧攷五代史盧光 稠將亦有黎球姓名相同恐非是

戴遲 殷琪 嘉定志有 詩二首

魯繇 登第詳選舉 志魯一作曾 戴光義

何迎 登第詳 選舉志 蔣肱 登第詳選舉志全 唐詩有詩一首

晏璩 嘉定志載璩有揭刺史增築羅 城外城內治璩塹記刻石今

陳炯 登第詳 選舉志 何幼孫 登第詳選舉 志孫一作遜

易標 登第詳 選舉志 李旭 登第詳選舉志全 唐詩有詩一首



晏 塘 攷明一統志及晏氏乘為晏殊高祖成通中舉進士後占籍高安未知即其人否

歐陽薰 嘉定志有詩三首按新喻唐有歐陽薰倍宗時結茅隱居讀書山中宅邊叢生瑞竹色爛如銀

丞相孫倅以謫官至見之嘆為神仙中人題所居曰瑞筠山今慧力寺其遺宅也寺內讀書臺故址存焉

今其地屬清江擬即是人恐薰為董之謬

伍唐珪 全唐詩有詩三首嘉定志載舉人有詩二首

徐 瓊 潘洵美

宋鵬舉 嘉定志有詩一首 袁希古

李餘慶 劉仁祥

彭維岳 據徵君世系名儀貞元七年與兄仇同登第

李 甲 按南唐斷軍吏有李甲未知是否 易廷楨

張 為 集一卷主客圖一卷全唐詩有詩三首 謝 辟

陳 嶰 嘉定志載舉人有詩二首全唐詩有詩一首

吳 罕 嘉定志載舉人有詩三首攷氏族大全李頰主試得許棠張喬喻坦之劇燕任濤吳罕張贛周

繇鄭谷李栖遠溫憲十一人謂之十哲前蜀春秋於十一人外多一李昌符謂十哲本十二人第罕蜀春

秋作宰當依大全

黃 諷 事實據十國春秋補嘉定志載舉人有詩三首

劉 望 嘉定志載舉人有詩三首全唐詩有詩一首

李 滄 彭 遵

劉 廓 嘉定志有詩三首 周 確

梁 珪 張 咸 嘉定志有詩一首



許洞

蔣勳

趙防

嘉定志載處士有詩二首全唐詩有詩一首

崔絳

致嘉定志有崔江載處士詩一首文獻畧以絳為江未知是否

南唐

盧邈肇族子唐末預湖南計偕舉進士有迴文詩二百首

官至祕書省正字載府志

沈彬字子文少好學值唐末亂離隨計不捷南游湖湘隱

雲陽山學仙道工詩句法精善與浮圖虛中齊己俱以

詩名尋歸鄉里時李昇鎮金陵旁羅隱逸名儒宿老命

邵縣起之彬赴辟知昇欲取楊氏因獻觀畫山水圖詩

云須知手筆安排定不怕山河整頓難昇覽之喜遂授

祕書郎保大中以尚書郎致政徙居筠之高安以卒載

南唐書參府縣志

王穀字虛中長於樂府有鴻門讌苦熱行暑月觀道傍樹

玉樹曲尤膾炙人口其玉樹曲內有句云君臣猶在醉

鄉中一面已無陳日月穀未第時嘗負氣忤人人欲毆

之穀揚聲曰莫無禮我便是吟君臣猶在醉鄉中一面

已無陳日月者其人斂衽慚謝而退始與崔允善將赴

舉允餞之有日者在坐曰待此郎為相乃登第後二十

年允為相穀遂登第官太學博士順義四年冬十月王



如白沙觀樓船載上書請改白沙爲迎鑾畧日日月所經星辰盡爲黃道鑾輿所至井邑皆爲赤縣王爲更其名曰迎鑾鎮終尙書郎載唐詩紀事參十國春秋

按嘉定志藝文有朱恂載郡人未詳何縣附此

宋

易著明字晦之博學精於聲律累被鄉薦時人爲之語曰宜春易著明擲地作金聲與石曼卿延年爲詩友大常少卿張羣贈詩有之子宜陽秀文章甲輩流之句天禧二年賜三班奉職終于左班殿直載府志

李觀字夢符士安從姪史傳諸書一過目卽成誦文章如

元次山慶歷二年試南宮賦偶失韻主司嘉其策特奏名登第時方弱冠以著作佐郎知清江縣事熙寧初爲大官令尋言役法不便通判處州題詩直廳有自知不是公侯骨夜夜江山入夢來之句元祐初監江州太平興國觀司馬溫公爲相以書召觀觀許之比至京溫公已薨除虔州不就請監南嶽廟以歸觀嘗創玉谿洞自號玉谿叟爲之傳洞有抱一堂水仙亭有梅所曰香雪塢有衆花處曰錦繡谷貯書史處曰文藪終日醉吟其中於世味淡如也少好神仙嘗遇異人劉海蟾每以得道自任將卒數日不食惟覽太平廣記神仙事跡且曰



蓬萊方丈吾其歸乎卒年七十二累官朝議大夫載傳  
信錄參府志

張嗣古登紹熙庚戌進士甲科歷起居舍人官至中奉大  
夫直龍圖閣真寧縣開國男食邑三百戶致仕卒嗣古  
有文名慶元以後凡郡邑紀述文翰多出其手宏碩典  
麗蔚爲時宗載府志

李公凱字仲容撰毛詩句解二十卷宋自淳熙而後說詩  
者率遵朱子之傳去序言經仲容獨取呂氏之書彙括  
以淑後進亦異於勦說雷同者矣

欽定詩經句解傳說多採其說載曝書亭集

按朱子全集淳熙辛丑後三月丙戌至尋真觀題名一  
十五人內有本縣彭樓子應彭鳳子儀二人未詳出處  
附此

元

夏鎮字定遠以春秋登進士授茶陵州判官終奉訓大夫  
學行端飭爲文章簡嚴有法度學者多宗之載通志

夏以忠字尙之宋信王夏協族孫以春秋試大都路流寓  
科第二授翰林國史院編修官調國子助教遷太史院  
都事洪武元年明師克燕悉官其知名士以忠獨以老  
病辭詔許歸會遣使搜訪元史強之如江廣以忠辭不



得命行至番禺卒太史金華蘇伯衡著文哀之載通志  
按歐陽圭齋集有郭廷秀駱秉哲未詳出處附此

明

龍暹字景升幼聰慧尤工書正統初舉童子科授中書舍  
人直內閣文詞典麗得上眷遷祠部員外郎預修英憲  
兩朝實錄晉太常卿食從二品俸馳驛還家廕一子一  
孫在薇省時所撰勅誥詞翰兼優一時冠蓋得其褒美  
以爲榮歸田後卒於家赴聞京師遣官祭葬載前志  
龍瑄字克溫家世襲父職遂居南京少警敏博涉經史遨  
遊四方與邱仲深羅彝正陳公甫爲布衣交重然諾尙

風義朋游有急揮金如土苴江湖間聲稱藉甚曰過金  
陵不識龍克溫猶徒行也著作甚富寓荆南築室海子  
山有鴻泥集在京陵有燕居集自號半間居士東江顧  
清作半閒居士傳子覓字致仁宏治癸丑進士官副使  
歸入茗溪詩社與劉南垣齊名其詩如姑蘇道中云野  
鶴巢難定春蠶繭自忙寒夜云氣回簷雪融還細雨濕  
樓烟重不飛皆濯濯有雅致惜其集不傳 載府志

郭鵬字時舉弱冠中正德丙子鄉試第一明年入監學益  
進祭酒崔銑重之屢魁大學卒年二十九載府志

高祉字用介琬之子嘉靖壬午舉人歷知鄞縣江浦南樂



三縣陞南京太僕寺丞璉居風憲時社閉戶勤學好與知名士分晰疑義若不知有門第者後屢試巖疆有惠政載前志

袁熙號白原一胎舉第三生有異徵岐嶷不凡七歲能文詞一目數行年十二入邑庠試輒冠軍謁督學試以對四馬十六蹄一日難行千里路隨答云孤鵬一雙翅霎時飛上九重霄淹貫經史詩歌樂府無不精妙年十八恩選入對大廷任廣西全州判服官一期以內艱歸遂耽意林泉築室于白原山課兒終老焉孫繼衮官孔目另有傳載前志

劉應選字志伊號傲韋迪簡曾孫幼聰穎絕倫過目成誦稍長學益博通五經諸史百家言年十一入郡庠屢試冠軍尤工古文詩賦落筆語輒驚人以選貢授南京詹事府主簿奉使潞藩不受餽遺改直隸長蘆運判清介剔除積弊多所建白爲當事所器服稍遷本都運同以剛直忤權貴尋謝病免官居家十餘年恬淡自甘日與諸生講學賦詩學者稱爲秀川先生年五十九卒載前志  
袁業渠字時薦學通經史百家言與兄業濂業泗切礪砥礪自相師友慨然有志當世之務爲文力追古大家邑令張本嘉器重之萬歷庚子鄉試張令豫列渠名以待



揭報捷音至果中式辛丑會試不第與分宜張承詔黃  
希憲李日新舟次鄱陽湖口長嶺下夜聞狂風大作渠  
與日新皆溺死張與黃得免哭之以詩傳有儘抱文章  
飽魚腹不將姓字占鰲頭之句載前志參分宜志

梁應賜字儼咫性英敏好學集書萬卷兄弟叔姪日久講  
習其中爲文根抵理法醇雅精粹由選貢生中崇正丙  
子舉人負大志不樂就職兄應賜姪佳植同時科第一  
門濟美人共羨之載前志

湯民熙字清海崇正丙子舉人少爲文縱逸奔放有千頃  
百折之勢試輒冠多士及壯沉酣經史文歸簡練生平尙  
氣節不爲物撓屢試春闈數奇不第任會昌教諭恒進  
諸生勤爲砥礪未幾致仕後耽泉石終其身載前志

李素字純白歲貢生庚辰特恩賜出身授高淳知縣博涉  
經史工詩翰詞賦如斗酒奏清平倚馬草露布其所長  
也所著詩文盈篋多散軼今鄉里耆英猶能誦說其長  
短歌行任高淳三年一以德化民至今奉祀不衰載前志  
何山字叔子幼穎悟文筆縱放督學蔡雲怡侯廣成屢拔  
第一崇正己卯魁於鄉庚辰會卷房考孫嘉績首薦主  
試弗錄識者歎之學邃於古爲文構思沉摯淺人不解  
其作何語卽深心此道者亦莫能贊其妙南昌杜果選



宜春縣志 卷三  
安雅集欣賞獨至傾動江左諸名士與兄江友愛至篤  
家事悉聽處分江亦悉心經理不以分其學業人以爲  
二難云載前志參府志

易嗣重字又尹幼嗜學年十五補郡庠生平好古博通經  
史下筆語言妙天下崇正己巳督學蔡雲怡奇之與陳  
大士揭萬年同恩選嗣是交游日廣吳門張天如楊維  
斗諸名士相與講道論文以斯道爲己任與同邑何叔  
子輩倡明古學南雍秋闈得而復失者二處友朋不阿  
所好後放情山水扃戶課兒丁亥奇荒斗米千錢族黨  
賴以舉火者百餘人復不事生業恥干謁惟以孝友傳

家著有澹園文集自怡詩藁卒年七十二胞弟嗣望子  
鳴雷俱府庠生載前志

羅袍邑廩生性穎異弱冠卽補庠生稍長博物洽聞試輒  
拔高等鄉試屢中副卷遂絕意進取黽勉教子克有成  
立載前志

袁繼袞字子衷熙孫稽古邃養足不履公庭力追崇祖烈  
與何叔子易又尹諸名宿風雨連床分晰疑義知府王  
友寰推官王懋弼下榻視學竟日不忍去屢試爲督學  
蔡雲怡侯廣成首拔著有自怡草皆本先正大家甲申  
歲貢生受翰林孔目未任卒子一進孫克舜俱庠生能



宜秀集元  
卷三  
三  
文載前志

皇清

袁一竣字子尙歲貢生襟期灑落學富縹緗精周易詩春秋與姪燕皇同筆硯蜚聲藝苑皆見知於督學蔡雲怡侯廣成時有竹林之譽廷試後家居淡薄自甘長材不展鬱鬱終老士林惜之載前志

張幼巡字同許歲貢生嗜古力學文思警敏豐贍與何叔子齊名督學侯廣成深重之爲文沉摯雄渾可置漢魏之座壬午以句有蒙莊寓言黜置副榜未幾卒載前志  
梁巨植字嵩生佳植弟七歲能屬文十歲遊泮爲文閎偉

奇肆千人辟易惟子史大家供其驅策而不屑於時藝屢試高等卒以數奇不偶每慷慨見志與諸名士言亶亶不倦惜年未四十賁志以沒三子皆以文學著聲載前志

林邦楨字子維少遊醫序五旬受餼督學趙優禮獎借爲文如呂梁澎湃一瀉千里十試棘闈至老不倦迄貢期滿年近八十辭不就卒年八十一長子燦詳儒林傳載前志

袁克昌號燕皇一鳳子鴻才好學雖居貴介攻苦不異寒儒常領囊與海內名士游學益進下筆洋洋灑灑文思



生不果元 卷三 三  
泉湧與族父一菁相切礪庚子中副車癸卯鄉試一菁  
餞之途既登舟復囑之曰局要簡練語貴沉雄克昌應  
之曰得之矣是科果雋淡於仕進隱居燕窩嶺詩酒自  
娛每遇地方利弊悉爲當事直陳邑人多利賴焉年八  
十四卒載府志

林喬植字遷于號靜菴歲貢生英年補廩屢見知於當事  
初宜邑學額與分宜等順治十七年奉

上諭增設大學分遂與宜相爭訟於督學李批諭兩學諸生  
不必嘵嘵候閱文日定奪發案植卷魁五學緣此而宜  
邑大學之額乃定有功於黌序大矣屢試棘闈薦而弗

售士林惜之爲文沉酣經史根抵宏深著有春秋典要  
子基敬郡庠生克紹經學載前志

方直字晦叔郡廩生性嚴正長於文藝童試時卽爲邑進  
士袁繼梓所器重延入西席名益噪尋肄業昌黎書院  
白鹿洞知府李南康知府廖悉優遇之纂修郡乘分輯  
邑志皆與有成勞善篆隸工詩詞手不停披晚年辭貢  
不就載前志

張鴻翥字漸達少負奇姿應童子試入庠歷試冠軍僅領  
甲戌歲貢遂絕志功名於薦裏鄉構蟠龍書屋棲遲自  
適肆志吟詠爲文揮毫落紙數千言立就羣推倚馬才



手不停披至老彌篤常開講席於萍邑遊其門者多名  
雋康熙甲寅棚寇猖獗妻許氏懷半歲男出奔遇寇氏  
不屈赴水死寇持其男去後十八年父子復合人咸異  
之丁亥除夕無病卒弟鵬舉邑庠生孫五霄鄉飲賓會  
孫文波邑庠生載前志

朱應斗字炳昭應星胞弟負性聰穎魁梧奇偉七歲失怙  
侍兄講席凜遵訓誨入邑庠尊食餼名噪文壇屢困棘  
闈未盡所學及貢而卒子權邑庠生載前志

廖士奇好學能文力行孝弟與弟士廉相師友並著聲庠  
序間廉文尤美秀屢試優拔未竟其學俱賚志早沒士

林惜之奇子宏邑庠生載府志

袁克觀字求章繼咸孫邑廩生少負才名與克龍克寵互  
相師友著有四書講義誘迪來學中丞宋垂念先賢後  
裔復悉其篤學能文特加敬禮惜當歲貢而卒子振翻  
邑庠生載前志

劉幼發字穎肇資敏好學淹貫六經手訂尙書輯解諸書  
多所發明詩歌詞賦其緒餘也食郡餼與弟長發試輒  
前茅二難競爽爲時所器重長庚午舉人幼發雖屢困  
棘闈益肆力先正故其爲文灑渾沉雄常受知於知府  
胡延主義塾諸生爭師之子履謙邑庠生克紹經學載



府志

陳希韶字正音副貢生弟希龍字宏音歲貢生並有文譽  
希龍工書法著作甚富後選德化訓導每聚諸生講學  
尤樂育貧士及門歲貢生葉光第司鐸來宜猶劇道師  
誼不置云

袁芳杏字壇彥一字魯齋雍正癸卯第八名舉人父起濤  
卽於是年會試中第八名進士時有鳳毛濟美之譽芳  
杏十上公車屢薦不第選授直隸撫寧知縣有循卓聲以  
親老告歸生平務爲根底之學枕經胙史作文矩矱先  
民尤喜造就人材學者皆奉爲楷模會分修郡志多經

裁正與分宜林有席網羅先正制藝爲袁陽文徵晚年  
操觚自娛號閒閒叟梓有四書文顏甲篇樂天堂詩集  
行世卒年七十有二子錫煥錫焯俱監生

甘士穀字暉畬由拔貢生歷任順寧知縣有近甸迎春四  
章檀默齋稱其得范文正瀟洒桐廬郡意後改煎京銅  
局以辨厥大羸陞同知所著有藝圃詩草一卷

張一清字體乾歲貢生幼穎敏力學工文試輒冠軍肄業  
豫章書院與林有席雷寅項鳴鳳齊以祖輩馳騁藝林  
名噪一時鄉闈屢薦不售及門多知名士著有四書文  
稿曙堂詩集



黃鎮標字統萬歲貢生性醇謹閉戶潛修古貌古心無所營爲作文如錦明花麗磬徹鈴圓一時競從之從弟清標附貢生是其成就

陳希城字亦厚歲貢生舉飲賓性孝友借弟希戴希裁講學不倦爲文頃刻立就弱冠遊庠卽食餼諸弟亦次第入庠序

李一元字育齋 恩貢生敦行積學設教西村古林菴雲巖文集數十年裁成後學多人及門如劉起瞻李道易晉書易謙光皆後先領鄉薦子應斗邑增生孫溶邑廩生

袁起渭字漁伯邑廩生父振鐸負才早世起渭生自遺腹謹遵母曾氏訓誨博學能文屢試超等與族廩生起瑩芳斂芳芸共振文名遠近咸以大器期之惜鄉試屢薦不售臨貢而沒從遊門下多知名士著有留雪堂詩集

黃河清序

張運南字垂雲一清子歲貢生學問淹博詩文力追先正立品端方教人敦本務實經指畫者多以科名顯知縣黃河清聘主宜陽書院講席互相唱和著有文集併制藝稿臨選訓導而卒子五兆絃兆綸兆琳俱庠生

彭之材拔貢生書法道勁工詩與兄之楷倡和無虛日歷



任湖北蘄州鶴峯州判以廉著聞

彭祖年字松軒歲貢生弟祖述字名軒 恩貢生爲同堂昆

季祖年稟庭訓爲文豪放祖述文特沉摯尤潛心理窟  
著有四書講義

易繁生而穎異作文風發泉湧援筆立就縣府道試皆冠  
軍人以小三元目之既入庠卽食餼秋闈薦而不售未  
幾卒咸爲惋惜

易儒傑字冠人乾隆壬子舉人少家貧師事邑廩生袁起  
渭愛其勤學不計束脩竭力訓誨又得兄力耕以助其  
膏火逾冠補邑庠歲科試輒高等督學胡豫堂趙鹿泉

深器之生平潛心義理凡經書子史靡不殫究從遊多  
知名士知縣黃河清聞其學欲聘修邑乘不果卒年六  
十九歲著有雲巖文集

段如錦字焜成歲貢生六歲時其父口授四書卽成誦長  
通易義叩之應對如響知府陳拔案首入泮旋食餼兄  
沒貧甚質衣物殯葬以子承祧爲嫁其二女晚年徜徉  
山水間年八十三卒子志浩歲貢生志淳志潔志洪志  
濟俱庠生志洪精醫屢著神效雖受有司知毫無干請  
人羨其清操

劉端字步綱舉人秉性質實深於文藝主講宜陽書院十



二年講學不倦門徒多所成就後舉鄉飲賓年八十四卒  
何起欽字文思乾隆甲寅舉人父大岐早喪母張氏延師  
課讀與弟起銳應童試屢拔前茅爲人恬淡不以富貴  
介懷家徒四壁以經史自娛掌教宜陽書院甄陶不少  
嘉慶戊辰大挑二等任南豐訓導卒於官孫運先庠生  
易謙光字曉堂幼穎敏十二歲時咏雞冠花有豈終霜下  
宿會向日邊啼之句其祖邑增生淑濤大器之乾隆壬  
子督學趙鹿泉取入縣庠甲寅舉于鄉其祖聞報掀髯  
大笑曰果不負吾望也入都赴禮闈與同榜鄒理堂饒  
綺峰友善辛酉薦而不售賫志以沒

謀學成字純甫副貢生讀書務精底蘊不矜涉獵爲文雄  
深雅健不落恒蹊居恒授徒以經義相切磨不計束脩  
獲雋者衆惜未竟其用而卒

易淑運字際虞邑庠生幼聰慧弱冠入泮博通經史作文  
援筆立就家貧硯耕以食遊其門者不計束脩多方啟  
迪及門成就者甚衆屢試高等其文尤爲督學沈中丞  
吳方伯陳所賞識試牘梓其文以行屢應鄉試呈薦者  
五備薦者三惜賫志以沒著有四書文稿子樹梧樹森  
俱邑庠生

曹文藻字魯彥 恩貢生六歲時隨其父邑庠生如懋授



書穎悟出羣家多藏書被災父爲手錄經史文藻鑽研不倦精制藝旁及詩古文詞督學蔣時菴歲試拔冠邑庠踰年食餼教授里中成就者衆爲人質樸率真丁父母憂幾於毀滅兄弟友愛最篤與弟邑庠生文淵共相切劘子席之孫法曾俱邑庠生

劉慎徽字從典父吉運工文章慎徽遵庭訓穎悟傑出試輒冠軍庚申舉於鄉人競傳其闈墨性淡榮利每引觴侍父講論日不離左右喜吟咏三試禮部不售惜年僅四十六歲而卒

易廷華字鼎志嘉慶辛酉舉人文思清健才亦明敏後應禮闈試便道山東遊其師李觀瀾幕助修河渠事因暴露風霜致疾而歿咸爲惋惜

劉起瞻字振元嘉慶甲子舉人爲文清剛靈敏尤工古文揣摩入大家乙丑夢得一聯滿腹經綸埋白土一腔心事問青天自紀其事果符夢而卒

周德潤字虛容生歲餘失恃家窘甚甫七齡父訓蒙外舍攜之館口授四書經義穎悟驚人爲文胎息熊劉氣味深厚羣推舉業正派知府林其宴拔冠童軍入泮秦中丞觀風舉首壓倒諸宿手名益震嘉慶甲子舉人辛未成進士生平志氣豪邁自號海千俯視流俗雖釋褐後



宜和集卷之三  
清苦若諸生毫不介意惜早世友人袁錫光爲刻海千  
遺稿以傳

劉潮字首攀家世多名流儒風淡薄常隨父爲協管記室  
投筆起曰此非吾志也協鎮樊聞而驚嘆謂此子不凡  
可畱署與兒輩共學逾年遊泮試輒高等作文宗大家  
尤工詩賦質幹魁梧眉目清揚善揮霍不較錙銖咸以  
大器目之庚午舉于鄉己卯成進士授戶部主事精勤  
供職閱案牘漏三下不休積勞成疾卒在京同寅鄉紳  
爲之經營身櫬歸著有制藝詩賦稿藏於家

袁季歲貢生際唐子邑廩生稟質聰明四歲時能誦唐詩  
數百首年十二經史皆通於天文勾股能得其意善屬  
文弱冠遊庠逾年食餼三赴棘闈薦而不售遂賫志沒



處士

漢

袁京不樂仕進隱居縣城東北五里山時人高其節義以  
姓名山後卽以姓名州豫章太守爲立高士坊祀府縣  
學鄉賢祠專祠縣學載統志通志

按京都邑志作漢時人江西林志及諸書沿引多作晉  
今觀此傳云豫章太守立坊則京當屬漢蓋宜春於漢  
屬豫章郡而晉則改屬安成且山川志袁山云昔高士  
袁京隱居於此則晉爲昔字之譌無疑

唐



彭構雲少通陰陽圖緯之學不求聞達于時元宗遣使齊  
延邱以蒲輪徵之至再始赴闕拜官不受辭歸孫伉貞  
元間進士載通志

按構雲一作雲構構一作構攷宋志徵君本名雲構因  
避思陵廟諱省作雲又徵君一作詔君聘君或云招君  
徵士

彭蟾字東瞻好學不仕以處士稱重修唐韻及著鳳池本  
草廟堂龜鑑共一百二十卷有詩十一首見宜陽集載  
通志

劉松字稽美昭宗時屢舉不第集郡人天寶以後詩得四  
百七十篇爲宜陽集六卷松有詩十首載唐書藝文志  
韋無強隱居十五年不出庭戶刺史董正欲表聞無強固  
辭乃建逍遙坊于其里載通志

按逍遙坊在郡治東無強卽居于此

宋

潘賁字子文七歲能詩性睿特自負才器動多屯躡左僕  
射沈義倫奇其才致門下賁凡三過省闈每廷試輒以  
目疾止故賁嘗與故人書云入叨殿試三對天顏會沈  
薨遺表薦之表上而賁疾作謂人曰挾冊爲儒白首塲  
屋不登一第豈非命耶吾受沈公知遇過厚生不能報



宜春縣志 卷三  
死得事公于泉下足矣詔下而賁已卒年六十沈氏諸子買棺葬之載文獻畧

袁邇臣皓之裔孫登慶歷六年進士是科邑中捷南宮者五人邇臣絕意仕進優游林下日與親友知契以詩文自娛懷才蘊德泉石幽貞人以爲追踵高士云孫孝顯進士詳孝友傳載前志

傅公謀善文章嘗作小詞曰草草三間屋愛竹旋添栽碧紗窻戶眼前都是翠雲堆一月山翁高卧踏雪水村清冷木落遠山開唯有平安竹畱得伴寒梅家童開門看有誰來客來一笑清話煮茗更傳杯有酒只愁無客有

客又愁無酒酒熟且徘徊明日人間事天自有安排其詞清雅曠達抗世離塵可想見其人又與分宜令許及之詩皆調笑可誦集不傳于世載府縣前志

孫適元豐間貢爲上舍後因伏闕言事罷行三舍法黜上書易丕等適遂拂衣歸教授于家終其身載府志

郝元鼎字寶之受學于鄭銓精經傳博學洽聞數舉不第教授鄉里卒無子其門人宦達者猶歲時上其塚載府志

明

袁經訓號曲池郡廩生砥行力學爲文雄深渾樸與弟進士魯訓共相切劘屢薦不售隱居山中寔別業課讀有



法度子孫遵之科名仕宦經濟文章繼繼繩繩袁郡論  
後裔人文之盛無有逾者至今郡人士猶企其福德載  
平園雜著

袁都邑庠生先世有隱德至都益懋厥脩年五十餘因長  
子業濱沒傷泣瞽目越十有餘年目復明另闢土室日  
隱其中旁搜地理醫學諸書垂三十餘年族人有身試  
于莽毒者悉爲出資估藥全活不可勝計孫繼咸爲兒  
時都甚器之曰是兒必貴恨吾不及見也卒年命姪百  
二擇日于六月二十六日辭世至期果無病卒年九十  
一贈資政大夫載前志

袁軾字欽禮邑廩生年十四失怙下帷力學入邑庠試輒  
高等入闈不遇毅然曰泉石可甘箠笥可嗜而奚區區  
爲惟日課子以程朱之學且曰遇則匡時不遇則抱箠  
三子業泗成進士歷官有聲亦不色怡曰兒輩自了事  
耳絕口不言家事日與里中講鄉約訓民行學者稱爲  
東泉先生年七十有二子五人著名者三以業泗累贈  
至鴻臚寺卿載通志

劉映涑字崑懸少浮沉諸生間氣豪宕崇正壬午舉春秋  
鄉試第一後棄家祝髮誅茅澗醴深山不復出尋卒載  
府志



潘騫字省齋泗之幼子邑增生蚤失怙恃能卓然自立志節邁俗以數奇屢困棘闈因嘆曰于公官廷尉先知日後當與吾惟植吾德以貽子孫慶由是益懋乃德遇士之困阨不時賙恤值郡邑有大興作輒先捐貲助理以為士民倡邑令王家賓雅重之年八十一無疾而終康熙元年以子于達貴贈承德郡載前志

袁喬登號澗松邑廩生積學力行淹博典雅工詩聯及地理諸書處友黨意氣投洽如飲醇醪性豪邁千金一擲無適念惟日以詩文自娛晚猶好形家言凡父祖諸塋葬皆其慧識至今應驗不爽七子長一鰲舉人歷官知府餘皆克世其業載前志

袁繼威字虎侯屢試優等萬歷乙卯悞入副卷即淡於榮進念弟繼威游宦數罹坎坷與伯兄繼臧朝夕侍養二老遂終身隱焉後膺崇正十六年歲貢載府志

袁繼騰字搏霄府增生行年八十餘舉飲賓少倜儻有志畧迥出塵表長而勤學力行討論先賢經旨學有淵源因屢試不偶遂隱不出人爭延為黨塾師一時知名士多出其門下載前志

袁繼誠字純菴篤於行義父業濱早逝大父都祖母張氏俱垂白在堂侍食早晚起居溫清無不盡節家清貧不



希榮利母鍾氏病目事之尤謹子一菁舉鄉試常試以  
慎操守傳清白雖食粗衣做不可厭年八十三舉飲賓  
卒年九十四載前志

皇清

周家楫字濟甫明舉人忠與謙之裔早有文譽屢困童試  
遂精岐黃術日以濟人爲念不較錙銖志潔行方羣謂  
其有高士風子維煥邑廩生載前志

易銘盛賦質聰穎經書子史能記其要爲文法本先民不  
求聞達有以名勸之者輒曰名者實之賓吾自踐其實  
何以名爲晚年於北壇金星嶺下構一書屋額曰淡齋  
清流繞戶菜竹映牕每日嘯歌自適綽有古處士風子  
二長淑霖郡庠生淑霖附貢生

陳廷鐘字振廷性沉靜簡默留心易義精數學生平落寞  
不阿世晚與鈴陽張西園萬鞞岡逍遙山水寄情書畫  
奕棋飲酒有自得趣孫樹豐舉人

易昌演字義傳之泰孫性孝友兄弟五人食繁產薄獨以  
其妻贈奩之資紓之生平守正不阿家居養晦雖近城  
市無事弗遊安貧課子不肯營求於人精醫卜堪輿諸  
家言子晉書舉人



宋百字許勳人

市無非此我愛爾者不肯營私做人欲爾

其美假奇文資極文舉事守五不同

其美斯字許勳文舉事守五不同

其美斯字許勳文舉事守五不同

其美斯字許勳文舉事守五不同

其美斯字許勳文舉事守五不同

其美斯字許勳文舉事守五不同

其美斯字許勳文舉事守五不同

忠義

南唐

盧絳字晉卿肇之後初名袞慕晉魏絳更焉讀書略通大

指喜論當世利病屢舉進士不第往來金陵丹陽間久

之乃上書論事陳喬異之表為光政殿承旨尋轉松江

兵馬監押募亾命習水戰宋師來討以絳為凌波都虞

侯守秦淮水柵屢勝諸將忌其能說後主遣出授潤州

節度使劉澄出送降欵絳率所部走保宣州金陵陷絳

獨不降謀南據閩中過歙州怒刺史龔慎儀不出迎殺

之而行太祖使絳弟龔招之至京師授龔州圍練使遇



慎儀兄子頴於朝曰是殺我叔父者執至殿陛訴寃詔屬吏樞密使曹彬言其才畧可用願宥其死使自効太祖曰是貌類侯霸榮何可留也斬於西市

按南唐書十國春秋所載絳事甚詳茲從府志

明

羅紳字尙訓宣德末年貢生先任四川鹽亭知縣成化間復任廣東石康知縣八年流賊陷城父子三人死節奏聞立忠孝祠特祀又入名宦祠石康後廢廟祀併台浦按紳廣東通志有死難傳

袁慶祥以貢入監待選吏部上疏言賞賜過濫所出不償所入又論刑部尙書董方身不執法而折辱屬官以自厲又言正本澄源宜從學校胄監親民之職宜慎簡縣令黜衰老以息貪汙宜用夏墳張元正高明羅倫以從士望書奏詔杖之東華門

袁繼咸字季通天啟五年進士授行人崇正三年冬擢御史監臨會試坐縱懷挾舉子謫南京行人司副遷主客員外郎七年春擢山西提學僉事未行總理戶工二部中官張夔憲有朝覲官賚冊之奏繼咸疏論之謂此令行上自藩臬下至守令莫不次第參謁屏息低眉跪拜於中官之座率天下爲無恥事大不便夔憲大恚與繼



咸互訐奏帝不聽乃子身赴任久之巡撫吳甦薦其廉能而巡按御史張孫振以請屬不應疏誣繼咸賍私事帝怒逮繼咸責甦回奏甦賢繼咸斥孫振諸生隨至都伏闕訴寃繼咸亦列上孫振請屬狀及其賍賄數事詔逮孫振坐謫戍繼咸得復官十年除湖廣參議分守武昌以兵搗江賊巢興國大冶山中擒賊首呂瘦子降其黨千餘人詔兼僉事分巡武昌黃州擊退賊老回回革裏眼等七大部黃陂黃安築黃岡城六千餘丈十二年移淮陽忤中官楊顯名奏鐫二秩調用督師楊嗣昌以其知兵引參軍事明年四月擢右僉都御史撫治鄖陽

未一年襄陽陷被逮戍貴州十五年廷臣交薦起故官總理河北屯政未赴賊逼江西廷議設重臣總督江西湖廣應天安慶軍務駐九江擢繼咸兵部右侍郎兼右僉都御史以行賊已陷武昌左良玉擁兵東下繼咸遇良玉於蕪湖激以忠義良玉卽還恢復武昌廷議呂大器來代繼咸仍督屯政大器良玉不協長沙袁州俱陷仍推繼咸代之甫抵鎮而京師陷福王立南都頒詔武昌良玉不拜詔繼咸致書言倫序正良玉乃拜受詔繼咸入朝高傑新封興平伯繼咸曰封爵以勸有功無功而封有功者不勸跋扈而封跋扈愈多王曰事已行奈



何繼咸曰馬士英引傑渡江宜命往輯王曰彼不欲往  
輔臣史可法願往繼咸曰陛下嗣位固以恩澤收人心  
尤宜以紀綱肅衆志乞振精神申法紀冬春間淮上未  
必無事臣雖鴛願奉六龍爲澶淵之舉王有難色因詣  
榻前密奏曰左良玉雖無異圖然所部多降將非孝子  
順孫陛下初登大寶人心危疑意外不可不慮臣當星  
馳回鎮許之因赴閣責可法不當封傑士英賺之俄陳  
致治守邦大計引宋高宗用黃潛善汪伯彥事語復侵  
士英會湖廣巡按御史黃澍劾奏士英十大罪士英擬  
旨逮治澍與良玉謀陰諷將士大譁欲下南京索餉保

救澍繼咸爲留江漕十萬石餉十三萬金給之且代澍  
申理以良玉依仗澍爲言士英不得已免逮澍繼咸既  
與士英隙所奏悉停寢明年正月繼咸言元朔者人臣  
拜手稱觴之日陛下嘗膳卧薪之時念大恥未雪宜以  
周宣之未央問夜爲可法以晚近長夜之飲角觥之戲  
爲可戒省土木之功節浮淫之費戒諭臣工後私闕而  
急公讐臣每嘆三十年來徒以三案葛藤血戰不已若  
要典一書已經先帝焚毀何必復理其說書苟未進宜  
寢之卽已進宜毀之至王者代興從古亦多異同平勃  
迎立漢文不聞窮治朱虛之過房杜決策秦邸不聞力



究魏徵之非固其君豁達大度亦其大臣公忠善謀翊贊其美請再下寬大之詔解園扉疑入之囚斷草野株連之案王降旨俞其言羣小皆不喜繼成汰其軍餉六萬軍中有怨言繼成疏爭不得又以江上兵寡鄭鴻遠戰艦不還議更造檝九江僉事葉士彥於江流截買材木士彥家蕪湖與諸商軀封還其檝繼成以令不行疏劾士彥士彥同年御史黃耳鼎亦劾繼成言繼成有心腹將校勸左良玉立他宗良玉不從云良玉嘗不拜監國詔聞之益疑懼上疏明與繼成無隙耳鼎受指使而言要典宜再焚江東人乃由是交口言繼成良玉倡和

脅制朝廷矣會都下又有偽太子之事良玉爭不得遂與士英輩有隙繼成疏言太子真偽非臣所能懸揣真則望行良玉言偽則不妨從容審處多召東宮舊臣辨識以解中外之疑疏未達良玉已反初繼成聞李自成兵敗南下命部將郝效忠陳麟鄧林奇守九江自統副將汪碩畫李士元等援袁州防賊由岳州長沙入江西境既已登舟聞良玉反復還九江良玉舟在北畔貽書繼成願握手一別爲皇太子死九江士民泣請繼成往紓一方難繼成會良玉於舟中良玉語及太子下獄事太哭次日舟移南畔良玉袖出皇太子密諭劫諸將盟



繼咸正色曰密諭何從來先帝舊德不可忘今上新恩亦不可負密諭何從來良玉色變良久乃曰吾約不破城改檄爲疏駐軍候旨繼咸歸集諸將於城樓而洒泣曰兵諫非正晉陽之甲春秋惡之可同亂乎遂約與俱拒守而效忠及部將張世勳等則已出與良玉合兵入城殺掠繼咸聞之欲自盡黃澍入署拜泣曰寧南無異圖公以死激成之大事去矣副將李士春亦密白繼咸隱忍至前途王文成之事可圖也繼咸以爲然遂出責良玉良玉已疾篤夜望見城中火起大哭曰予負臨候臨候繼咸別號也嘔血數升遂死其子夢庚祕不發喪

諸將推爲帥移舟東中朝皆疑繼咸良玉同反而南都時已破諸鎮多納款繼咸勸夢庚旋師不聽遣人語林奇碩畫士元母爲不忠事林奇碩畫士元避皖湖中遣人陰逆繼咸繼咸已爲效軍給赴其軍將及湖口而夢庚效忠降於我

太清遂執繼咸北去館內院至明年三月終不屈乃殺之明史  
欽賜專謚忠毅

按諸書所載繼咸事實甚多不能悉載茲謹遵

勅修明史列傳及勝朝殉節諸臣錄

已上忠臣



彭世昌字襲之謹身修行以名節自持楊行密據淮楚召  
為長史辭不就隱於邑之修仁鄉一日有豪猾子數百  
為羣劫之曰吾徒遭亂世未有所托今德足而智有餘  
莫若君請隸焉世昌正色叱曰梁汴之間真人出矣不  
知命數而逞無窮之欲智者不為也敢辭復請又辭三  
請之不從設棘簣繫其上而焚之諸孫仕宦有聲載府  
志

南唐

彭世昌字襲之謹身修行以名節自持楊行密據淮楚召  
為長史辭不就隱於邑之修仁鄉一日有豪猾子數百  
為羣劫之曰吾徒遭亂世未有所托今德足而智有餘  
莫若君請隸焉世昌正色叱曰梁汴之間真人出矣不  
知命數而逞無窮之欲智者不為也敢辭復請又辭三  
請之不從設棘簣繫其上而焚之諸孫仕宦有聲載府  
志

宋

晏父字明粲風度秀整主趙崇雍後雍逮繫父自請詣獄



俱以庾死其詩見谷音集載府志

按谷音集清江杜本伯原輯遼東王澮等二十五人無名氏四人詩一百首蜀郡張架跋云皆宋元初之節士多幽人清詠之詞題曰谷音者山谷之音野史之類也王阮亭香祖筆記云谷音集三卷其詩慷慨激烈古澹蕭寥非宋末作者所及此書毛氏汲古閣本與月泉吟社合刻最工施愚山備兵湖西又嘗刻之清江

袁臯節義素著值建炎三年金兵渡江諸州皆降臯與梁超同謀遇殺反被超害知州事鄭詮有乞旌劄子載嘉定志

元

彭維凱復袁州遣迎監郡某元帥以下歸視事守土將某忌其功遂殺之郭鉅哭之以詩稱爲義士載府志藝文

明

張鐸景泰四年凶荒出穀七千餘石以助賑濟有司奏聞特賜勅獎諭旌爲義民

袁良文字泉岡鄉飲賓性孝友敦行樂善每輸粟以濟人春出秋收不取息厥後子若孫曾四代遵行不怠里民多沐其惠年九十四以壽終載六柳堂集

袁輅字路泉邑庠生好行隱德有知之者謂曰君竟全人



婚姻濟人危急如此輅終不言載晏一齋集

彭新橋崇正丁丑臨藍寇圍袁城扎營北關新橋總城下

夜渡水率二人焚燒賊營賊驚潰郡城解嚴旌以義官

載前志

劉啟秋字開之由吏員考授典史持身水鏡訓子有義方

崇正丁丑流寇臨袁固守城池日給饘粥尤為有功德

方子增歲貢生載前志

甘逢泰居家孝友待人和平值歲饑性樂推解明季寇亂

挾之不從死子濬貢監生濂瀛俱庠生載前志

彭汝明字天目恩選貢生生平孝友謹飭不妄發一言崇

正癸未獻賊陷袁以偽官啗人汝明憤謂所親曰鼠賊

耳計日當撲滅挾書冊走安福境上久之聞左兵至疾

歸圖謁諸鎮將言地方殘苦事至城東五十里遇左兵

執之汝明曰我讀書士也不得無禮兵大譁噪炮烙之

罵不絕口死汝明父子兄弟五人俱篤行能文長兄舉

人汝翼先逝餘俱死左兵凡男婦一十六口僅存二三

子匿山窟中得免載府志

陳嘉言字允臣郡廩生篤志經史行誼端莊崇正癸未逆

賊張獻忠破城避明月山下隨被搜獲見其姿品魁偉

知為名士欲授以官厲聲叱曰死則死耳豈肯受非義



之榮不屈而死有同被執獲脫者悉備述不置云載前志

龍汝登剛勁有方畧不怠忠義崇正癸未張獻忠陷袁州汝登與蕭某等團練白沙賊不敢進號鐵白沙時有同里某欲附賊汝登以大義切責乃已寇平梓有義勇錄易嗣重序詳藝文

皇清

朱光祐字象賢父憲有孝行順治丁亥荒捐粥賑饑全活難以數計家口幾至乏食施棺掩骸平塗修橋習以爲常年八十三卒四子應星瑞金訓導餘俱廩庠同邑例

貢生錢世模修橋賑饑亦好行其德載府志

袁一忠字鍾奇號中亭兩中副車業韶孫素性耿介不趨炎熱專恤孤貧順治丁亥奇荒穀值昂貴無糴一忠積有千餘石願捐出賑濟宜分二邑舉家賴活者甚衆明季稅重穀賤雖巨富多爲賦累一日嚴寒盛雪官役擒逋賦者縛至中途栗村一忠見其人凍饑欲斃卽捐金代完以釋之生平排難周急類如此至於修理橋路振興文教諸凡有關風化事輒躬先倡率不遺餘力有司屢旌其門後授修職卽子克貴邑庠生克贊 贈修職佐卽克賢吏員皆樂善喜施季克贊邑廩生文行兼優



詳儒林傳孫振鐸歲貢生歷樂平教諭有文名振鉞振  
錄俱庠生振鏘邑廩生書香累代振振識者以爲世德  
之報云參載前志

張慶甫制行篤厚慷慨樂施順治丁亥奇荒設粥賑饑里  
中待舉火者甚衆更施棺助賻拯危急修葺橋梁道路  
年九十八卒孫英監生芟蓼藩俱邑庠生曾孫標歷官  
陝西都司詳宦業傳載前志

彭飛邑庠生篤於孝行善事母謝順治丁亥奇荒設粥活  
衆每遇暴骸輒助棺以瘞世居螺江橋其地爲江楚通  
衢飛捐貲修理橋路行人稱便男嗣儀嗣儼孫祖臯俱

庠生載前志

張臣誥字瑞廷崇正末年以童子入泮後遂絕意進取性  
慷慨好施順治丁亥奇荒道殣相望爲粥以活窮餓有  
里民失糧金將出妻以償臣誥代金輸納生平事親孝  
與人恭雖家居無失言失色邑令董顏其堂曰德門錫  
類子鴻翥歲貢生鵬翥邑庠生載前志

李齡字伯壽性醇謹孝友敦篤撫孤姪調娶婦捐貲汰糧  
修葺橋路施藥餌救溺女排難解紛有功里閭晚年泉  
石自甘惟以課兒爲事年九十六卒子宏智丙寅拔貢  
生載前志



張世華字元玉質直好義少時他往有同舟狄二遺金華拾之維舟以待狄回還之封識如故屢捐貲倡修沙陂秀江各橋及古林明惠演教華山諸刹歲歉捐穀賑濟建郵亭施義漿棧券助殯不可殫述知府李曾旌其廬長子潛攸縣知縣世華諄諄以勤王事卹民隱爲諭年七十七卒次洪泳暨孫國標國權俱由監考授縣丞國柱國林俱庠生載前志

劉鑑字厥成爲萍鄉蔡姓婚婦翁早世妻弟之兆幼孤撫之成名更爲恢廓家業毫無所私曾捐金脫鄒應川於難康熙戊午歲饑減價平糶設粥賑救全活甚衆平時排難解紛除道成梁不可枚舉爲人謙和善下以忠厚爲家法子希灝庠生孫樸歲貢生有文名林森杰梧俱庠生載前志

徐溥字克廣歲貢生父寰宇有隱德清汰浮糧曾解囊百金以助公費溥善承父志慷慨好義撫孤姪茂齡德彰教育婚配如己子凡里中有急者無不捐貲調濟修葺橋梁道路樂善不倦兩江總督張親巡袁郡咨訪善士咸舉溥以上制府表其閭子希度綸捷孫世昌俱庠生載府志

楊文用字公享以誠齋孫弱冠食邑餼篤學力行仗義守



正地方利弊輒直言無隱如清汰浮糧倡修橋路其功德及人者居多兩舉飲賓辭不就壽九十二卒子嘉楠嘉相嘉槐孫焯炯俱庠生載府志

葉峻由郡廩生入監端方自持里居相爭者力爲排解孤苦無依者深加賙恤屢試棘闈不第赴銓部試以疾還未幾卒子開艷邑庠生載前志

楊文潤性篤厚生平輕財好義賑困乏埋胥掩骼脩理橋路設濟渡建茶亭善行甚多子嘉權業儒早卒文潤撫二孫皆成立邑庠生輝年踰八旬好義如文潤人皆賢之載前志

劉任九性好善嘗施棺木修橋梁有司曾給功存利濟額年九十四歲載前志

彭維五嘗捐金修理橋路荒年煮粥濟饑有司曾給行孚月旦義高井里二額年九十餘歲載前志

劉國章忠厚剛直性至孝友尤喜施予里人稱爲善良孫汝琇庠生載前志

袁日榮急公好義捐修橋路不惜財物壽百歲乃卒子鼎庠生載前志

徐名臣字揚宇輕財好義捐修橋梁荒年煮粥以濟饑民全活甚衆載前志



易子善好行義排難解紛周濟貧乏每遇孤弱更加憫恤  
學院何顏其堂曰德裕後昆子聯昇由監生授州同職  
載府志

何泳嘗捐金全人夫婦修理橋道荒年煮粥平糶有司屢  
旌其門載府志

施霑字仰明性慷慨好施予解衣推食救患恤災尤喜修  
橋葺路郡邑官皆表其閭載前志

王道先字德臣爲人好義輕財樂善喜施嘗修道路建茶  
亭施棺賑米全人婚姻重修獲鹿廣潤二橋知府胡給  
扁旌之惜年未五十卒載前志

胡煥璵邑庠生歲饑賑粥全活頗多夏濟藥冬施衣死無  
歸者殯瘞之邑公事如學官橋梁道路倡捐修建舉鄉  
飲賓載府志

周文德邑庠生助修文廟倡建考棚以善行三舉飲賓乾  
隆癸亥歲饑知府程文華捐米賑濟僚屬紳士公舉文  
德等司其事廢寢忘餐備極勞苦同事者邑士傅應龍  
袁世捷陳清敏周宏緒彭繼伉周恢緒袁士濂楊兆麟  
袁振華徐鍾英李年芳張于陞張天鉞易文檀周履易  
欽易殿颺周嗣讓謝烜何良貴楊繼震載府志

梁錦鶴邑庠生佳植孫仗義敢言乾隆癸亥歲歉倡里人



賑粥獨宿賑所督率均給又自購穀石減價平糶爲諸  
富戶倡舉鄉飲賓子日華舉人詳宦業傳載府志

胡安榮邑庠生乾隆癸亥歲荒煮粥食人城東關外孔道  
及湛郎橋捐貲六百金石甃坦平同時劉之鴻錢世象  
乾隆癸亥歲賑粥平糶施棺掩骼修砌石橋年皆踰七  
十載府志

唐桓字堯紉好施予乾隆癸亥歲荒賑粥平糶知縣張景  
載獎以惠孚仁里額年踰七十附載府志

袁宜廷質直慕義自栗村至迎村十里爲邑北鄉孔道修  
砌坦平建亭施茶年踰七十載府志

陳廷憲常恤孤寡建橋梁施粥賑荒子聖恩庠生好施予  
一如廷憲舉飲賓載府志

劉林邑庠生好周人之急遇歉歲平糶賑粥施棺造橋人  
多頌之舉鄉飲賓載府志

郭九錫好施予嘗捐建長橋及廣潤橋施棺賑粥好賓客  
獨儉已茹素舉飲賓有司屢旌其廬同時龍維祁亦性  
好施予以善行聞於鄉載府志

余秉善邑庠生幼喪母哀毀如成人父病衣不解帶者數  
月以勞瘁卒其父運昌叔父運昇賑饑施茶倡修橋道  
俱舉鄉飲人謂之善門載府志



宜春縣志 卷三  
彭孟卽性慷慨好義嘗至萍邑宮江適橋缺費石工扭首  
事者赴水孟卽救解詢得實卽出四百金竣事遇年荒  
減價平糶遠者投餐康熙甲寅棚寇猖獗倡義勇禦之  
身受賊刃鄉里得無恙丙辰寇復入猝不及避有渠魁  
戒其黨曰此公夫婦吾儕受一飯恩傷善人不祥遂獲  
免子澤溟澤濟澤潤嗣父志捐修沙陂橋墩裔孫以舉  
人宰縣者二

彭程宏字名遠性勁直膽識過人康熙丙辰棚寇逼境程  
宏僑居萍地偵知之夜馳歸沿途叫喊至中溪聲咽不  
能言急鳴鉦聚族指畫賊形勢衆踴跟奔避族賴以全

同時程淑體胖步艱匿屋後屢被擒將刃之神逸自若  
給曰我有金盞負我歸取寇信既至家屬聲曰我無藏  
金特欲枕首邱耳及交下死程淑晚年克鄉總正尤著  
直聲云

彭井六慷慨好施與曾因耕作買牛路經溫塘遇鬻妻債  
逋者哭之哀聞而惻然傾囊以完其夫婦曾孫之才拔  
貢生任蘄州判

易文檀字杏英邑庠生少穎悟力學孝事父母爲人寬厚  
仁慈喜調恤貧乏於喪葬無力者尤急代完其事乾隆  
癸亥歲荒倡議捐米賑粥知縣張郭二令皆額以藝苑



鴻材子殿欽殿屏監生殿掄職員殿藩業儒孫枝秀發  
振振

易淑霽附貢生兄沒謹事寡嫂撫孤姪教育有成外祖劉  
氏貧與兄淑霖割田六畝以贈每歲出米周鄉鄰空乏  
居族正十餘載公直無私年七十時知府盧序其德行  
子五孫十六曾孫三十六人列庠者十二在梧在書相  
繼登鄉榜

謝學禮庠生幼失怙奉母孝謹家頗裕遇歲荒命長子烜  
設厰施粥康熙年間大水施棺百餘以掩溺斃設家塾  
延師課族隣子弟已任俸資子六五入庠序

劉文祿年十六應童子試於郡城西拾遺金數十兩廉得  
其人還之後與椽考康熙間邑苦賸糧官民受累知縣  
王招徠勸墾文祿贊畫事成額以經國掄才事繼母以  
孝謹聞子灼煌燦俱庠生孫上翥邑廩生上遊上逢俱  
庠生上建著職

柳銜幼失怙恃族叔焜六撫之有成其叔曾鬻田數十畝  
於父以償債金銜取券焚之歸其田路拾遺金卽帖告  
失者還之邑中公事樂助不倦舉鄉飲賓年八十四卒  
李泰崑性誠實應童試不售遂業計然術偶於路側拾遺  
金一囊候失者覓至三日有建昌胡某踰跟奔尋詢所



遺適符卽全還之胡請酬以半不受請三之一固却之  
後其孫宗周宗允俱庠生宗夔宗縉宗敎俱職員宗冠  
監生觀瀾以舉人在山東知縣足徵陰德食報

林芝茂性敦古道喜推解有韓朝陽負其債千餘金率妻  
子願爲奴婢以償芝茂焚其券並贈金以爲贖本其人  
感泣今孫枝繁衍森入邑庠

李肇藩監生性孝慈善事繼母乾隆癸亥乙酉歲荒設粥  
賑饑倡建浮橋購租善後平治道路知縣張額以惠風  
仁里署縣費爲列名旌善亭庚子舉飲賓年八十一卒  
子禮邑庠生南英監生孫養浩呈墓俱庠生開泰監生

潘兆璜監生秉性仁孝六歲失母日夜悲啼父患瘋疾四  
年服侍不懈嘗估豐城市人付售貨銀百兩路失之卽  
不追取邑中公事竭力勦成貧困無依者賜恤甚衆七  
子四遊庠序

袁恭炳字貴廷敦尙孝友和睦族隣乾隆乙酉歲荒倡捐  
施粥米不足與姪職員天紳往湘潭市米接濟爲族長  
家風嚴肅後舉鄉飲賓知縣成額以德邵齒優

陳天玉性淳厚喜施乾隆乙酉歲饑捐米賑荒爲族長設  
祭田貧不能殮者助棺木後舉鄉飲賓年九十一卒

李宗榮監生秉性淳樸樂善好施遵父遺囑焚借券千餘



金獨力修城北壇溪及兩路口橋路費四百餘金又捐金置祀產以敦宗族

蘇世芸郡庠生性孝友樂善好施凡修橋道路傾囊飲助族隣有貧乏者恒量力周恤課子讀書有義方迄今孫曾足徵實行

李宗允邑庠生溫厚和平無疾言遽色鄉隣有釁出錢代爲排解善醫貧者贈藥不取值修橋路樂助弗吝臨老目力精明手不釋卷年八十八歲子四獻書邑廩生蕭仍拔字德真好善喜施嘗捐金修建橋路施棺木年七十餘卒子光照川楚例選從九捐建考棚克承父志孫

長齡例貢生長榮職員

袁騰雲監生以勤儉起家樂善好施設茶亭修道路施棺掩骼貸錢與人不取息孀孀無依出己田十畝以養人競稱之子三景標邑庠生川楚例選從九景松監生景桃業儒

陳宗海監生性仁慈端方喜周恤貧苦乙酉歲饑傾困減價平糶倡建二石橋及率陂石堤灌注永賴子之謨邑庠生大謨之誠俱監生

袁崧字嶽尚祖欽祿忠厚起家邑侯劉賜有世德望隆匾額父沼庠生性公道舉鄉飲賓崧承緒精舉業捐貢應



宜春縣志 卷三  
鄉試屢困棘闈生平好善喜施豐年積穀備荒減價平糶貸錢不責償創立宗祠多修鄉間橋路並獨建縣學大成殿學憲王額旌以重道急公年六十授州同職加級請封祖父及身皆奉直大夫七十壽終侍郎陳希曾辛從益翰林易曰廉知縣徐輔忠各爲傳序表銘以稱焉洵鄉邑善士子朝儀朝任朝侃俱監生朝偉朝佐俱庠生湯廷魁字文華邑庠生正直端方處鄉黨恂恂自飭性尤好義金瑞各處橋路踴躍樂輸乾隆乙酉歲歉施粥賑饑嘉慶乙丑穀值甚昂倡糶米以濟貧民子六占鰲邑庠生金鰲舉人

晏楫監生性孝友慷慨好義嘗修橋路平糶賑饑舉鄉飲賓夫婦年俱九十子際韶際光際熙俱庠生

周嘉槐字植成一字藝園少穎敏嗜學爲文不落恒谿弱冠補邑庠援例入貢性孝友不尙浮靡以勤謹起家喜施予修路平糶施棺木倡建宗祠善舉不一課子孫最嚴子汝煒監生汝衡例貢生嘉槐將沒呼二子囑曰吾心所欲爲者皆遂惟宜陽書院缺膏火有志未逮汝曹勉之汝煒卒次子汝衡暨姪監生培鰲捐田四十五畝六分克繼其志邑侯程額以義著宜陽

蕭飛熊字遠鳴一字雲屏邑庠生性孝友端慤居城市足



不履公庭尤好義邑中公事樂捐金贊成貧不能殯者  
買棺以葬近郭古塚爲培築之姻族貧乏不時周恤三  
十喪偶不再娶年六十四卒子四榮詔監生元善邑庠  
生建中邑廩生致中業儒

張學義職員生平急公好義乾隆甲辰秀江橋圯溺斃多  
人買棺掩瘞邑侯成題額優獎又捐修石街及助資邑  
中諸興作不少邑有宜陽書院田少不敷膏火臨卒猶  
惓惓囑其妻易氏慨助田租子監生雲衢孫涵琴遵遺  
訓助田租六百有奇邑人德之

徐鍾賢字賢佐例貢生性慷慨好施城東下浦獲鹿橋圯  
捐貲重建費萬金又修長庚松齡諸橋及省城貢院號  
舍所費不下數千金有司屢旌其門年七十一卒臨終  
猶以沙陂鞏村諸橋囑其子監生汝亨捐修逾年克成  
厥志撫憲程額以急公好義

易煥成監生居親喪毀容廬墓倡義塾置義田以獎後學  
嘗見遺金在道守待以還失者子在恭監生在茲庠生  
張一觀字均士安貧樂道精岐黃旨及堪輿家言雖乏晨  
炊手一卷不釋師黃選金醫得力于難經石室秘書活  
人甚衆三十喪妻不娶知府朱高其行接見甚洽有富  
人涉訟夜投千金却之卒年八十九子運謀世其醫運



謨舉人

劉光綬監生善事父母喜調濟嘗助修橋路施棺掩骼嘉慶甲戌乙亥歲荒減價平糶鄉里稱之

劉錦陞字巨卿附貢生幼警敏以縣拔第一入邑庠生平敦崇古道慷慨好義嘗于試院前建兩棚邑舉人有貧乏不能北上者獨傾囊相贈多成進士其識英傑成人之美類如此

蘇家謁監生秉性端方持身謹愨奉母以孝聞樂善好施與待舉火者千餘家爲鄉里所矜式年四十卒子應選應遴俱業儒

廖廷標字壽齡監生性孝慈立品端方善事父母好修橋路並捐育嬰堂貲乾隆癸亥歲饑首倡施粥貧民尤感賴之子三世忠邑庠生世舉世鵬俱業儒孫家欽家鳳俱監生家桂郡庠生

易煥韶職員生平崇尚節義遇貞婦烈女無力舉報者輒解囊相助又嘗修建橋路費多金無靳色子在松監生孫錦鵬郡庠生錦元邑庠生

李廷謀州同職承父志倡修秀江浮橋文筆峯下渡船又獨力修葺北關外街道南岸大路秀江兩渡船並施棺木所費貲財不少



袁德吉居珊樓夫婦孝慈樂施捐貲完萬邑礮工萬合嚴  
申詳制台趙旌以積善慶餘額繼因獨建余家坊石梁  
經本邑明府張復以樂善好施顏其室凡賑飢潤渴及  
捐修本處礮路以及濟人利物事無不慨慷樂爲鄉里  
德之一經傳後子以先以忠並監生孫鳳賓鳳岐鳳林  
鳳儀均庠生鳳臺鳳翥均監生鳳翔職員曾孫際周庠  
生際虞際春際英際泰並監生人文蔚起咸以爲厚德  
之報云

鄒伍臻字鳳彩耆職性剛方爲人正直不苟取亦不苟與  
家計不甚豐凡鄉中修橋梁平道路靡不踴躍爭先以  
爲倡遇歲歉平糶以恤隣里人多頌之子大衡孫士涵  
俱監生

徐宏鵬字雲上邑庠生生平節儉自持家居豐厚淡泊自  
甘如遇修建卽不惜巨費城北秀江橋圯多年宏鵬獨  
力承任改建於縣學之下費三萬餘金工未竣而宏鵬  
沒子邑庠生克竟厥功有司屢旌其門撫憲程以急公  
好義額旌之  
已上義士義民



皇清

袁克季傾貲修治道塗周恤窮饑一鄉稱善士妻早卒有勸其續娶者季曰節與義一也欲妻守節而自虧於義可乎遂終身不再娶督學姚額以誼篤倫常年七十四卒同時庠生謝聖恩青年喪偶誓不再娶其行誼無異克季載府志

袁起潤年十八娶妻越六年失偶家雖豐裕誓不再娶奉雙親無違訓一子以義方清操爲鄉里所重已上義夫

孝友

宋

易延慶字餘慶重之孫父贊以勇力著名膺入南唐仕至雄州刺史延慶幼聰慧涉獵經史尤長聲律以父膺爲奉禮郎顯德中周師克淮南贊歸朝授道州刺史延慶亦授大名府兵曹參軍後爲大理評事知臨淮縣乾德末贊卒葬臨淮延慶居喪摧毀廬於墓側手植松柏數百本旦出守墓夕歸侍母紫芝生於墓之西北數年又生玉芝十八莖本州將表其事延慶懇辭或畫其芝來京師朝士多爲詩賦稱其孝感服闋以母老稱疾不就



官母卒後藁殯數年延慶出爲大理寺丞嘗司建安市  
征及母葬有期私歸營葬掩壙而返知軍扈繼昇言其  
擅去職坐免官復廬墓側數年母平生嗜栗延慶植二  
栗樹墓側二樹連理蘇易簡朱台符爲贊美之卒祀縣  
學孝弟祠子綸祥符元年進士載宋史參李志

按延慶宋史通志俱云上高人攷其祖重爲宜春狀元  
延慶又以父贊廕敘得官何至忽隸上高且其子綸通  
志又列袁州進士恐宋史通志皆沿上高志混載之訛  
李奇字子正景祐元年登第嘉祐中任職方員外郎性慷  
慨不事產業悉以祖產分兄弟仍戒子孫不得追取既  
卒族人端以詩哭之有祖來產業分兄弟身後詩書遺  
子孫之句載府志

羅長康字偉正政和五年進士歷官寺丞出知永州迎其  
父以養因名州署之後堂曰戲綵待制胡寅記載府志  
袁孝顯名烈以字行邇臣之孫紹興庚辰進士官大理寺  
評事請終養回籍旁通形家諸書因相度地形與其父  
樞機由袁山故居卜宅於縣之北鄉鷄冠嶺橫塘家焉  
父子家居惟以孝友訓其子若弟怡順一堂絕不談及  
勢利鄉里稱之子仲高大理寺左寺正載前志

明



宜春集卷之三  
易直字子順少讀小學躬行家禮父廷選性嚴諸子少違  
直輒跪伏終日嘗遇寇抱母哀慟賊舍之治喪不用浮  
圖奉父母合葬廬墓三年服闋應貢傷伯仲早世祠墓  
無所主上書求解學校籍學使者許之遂讀書暘崖山  
嘉靖初有司舉義行詔旌直孝行之門卒之日囑無以  
旌表孝子書銘旌著有詩文家禮若干卷祀縣學孝弟  
祠同時孝子鍾名揚亦受旌表見明史

潘泗字石塢歲貢生姿儀修挺剛直不阿值父母遭危疾  
服侍殷勤幾於勺水不入其口迨沒安厝廬墓三年克  
盡其禮兄澮懼佃寇之禍及已泗代爲之理而得釋庚

子瀏萬盜獠焚掠延逼近境泗聯絡鄉勇礪器械防禦  
盜不敢入族里賴以安全生平通財好義樂排解末年  
授訓導以年老辭日與子若孫談文講藝著有抒懷諸  
詩文卒之先日囑其子曰吾生不離父側沒當厝於穴  
傍其孝行至死猶篤載前志

潘士侃字弦箴郡庠生萬歷乙卯副車孝友性成侍父懋  
舉疾勺水不入口者屢日夜稽顙北辰願以身代父沒  
廬墓三年性剛直不阿能濟以和平喜施助有貸者不  
能賞輒焚其券族里無間言子師默師燼俱庠生載前  
志



朱憲字霽空志同懷弟性至孝母病親嘗湯藥旦夕靡倦  
 母沒水漿不入口葬祭盡禮率姪光裕光祺奮志力學  
 屋後有石乳洞夏秋居其內研究經史髦而益勤因號  
 乳洞主人子光祐歲貢生文學有聲載前志

方惟信字啟元由掾考職以親老弗就平居力學敦行孝  
 友奉養祖母易氏朝夕勿替崇正丁丑冬臨藍寇環城  
 日炊食餉東偏守陴甲士城獲不陷子直郡廩生載前  
 志

劉而寬字次公弱冠補郡庠生好學有質行崇正癸未獻  
 賊陷城寬兄而實奉母先竄寬侍父奔避倉卒中賊突

至與父相失追尋父踪為賊所執欲授偽官寬憤恨毒  
 罵百折不屈賊怒殺之祀縣學孝弟祠妻王氏避集雲  
 鄉左兵搜見之氏恐受汚投六口江而死載前志

袁蘇九明末時當張寇猖獗縱火焚廬蘇九遇災而出以  
 母棺在堂復入室救護遇賊格殺祀縣學孝弟祠載前

志

袁一藻字文茂繼成子邑庠生廕入國子監樂善取友常  
 集知名士日相摩切拓落自喜了無貴倨容天性至孝  
 丙戌以父誓守忠節冒險赴難身陷揚子江啓行與母  
 訣曰曹娥猶知抱父尸况負昂藏七尺軀耶時以為忠



宜春縣志 卷三  
孝萃于一門云載府志

楊文盛字用蔚性敦厚居家孝友重然諾長古文詞家無  
擔石晏如也母沒遂絕意進取嘗有不捧毛生檄浮雲  
視鼎台之句結茆山堂以自適知府晉國壁以舊知招  
惟抱歐祥誤報鄉斗作官斗志具草條上自是不復出  
著有倚崖集載前志

尹大祥性孝友當左寇肆饑時父母被擒祥冒刃哀懇求  
以身代幸得身還兄弟離竄越省訪求生平樂善喜施  
和鄰睦族人皆德之子三聘監生載前志

臬清

鄒應龍幼習儒業屢試不售爲藩掾三載以父希賢患瘵  
遂罷歸奉飲食親湯藥始終不匱事母謝孝思益篤廬  
墓三載號泣罔輟鄉鄰聞之墮淚順治丁亥奇荒多方  
應濟尤善醫活人無數子學孟邑庠生積學力行有文  
名載前志

潘鎬邑庠生好學能文行至醇謹少孤事母不違色養家  
貧投徒每得升斗卽備甘旨以遺母而饘粥自甘母病  
瘳日侍湯藥衣不解帶屢月兄鐸力學而天所遺孤姪  
女撫育如己子鄉里稱其孝友年逾四十卒母汪氏冰  
霜苦節年八十餘載前志



宜 卷之三  
楊嘉楨郡庠生順治丙戌春兵亂父文盛避兵山堂兵將至楨從間道渡水報父水急被溺流至深處猶躍出水曰速走速走隨溺死父悲痛不勝端陽日哭之以詩曰浪跡當年學阮浮沉樽酒日悠悠况逢歡笑天中節更接慇懃地主酬老大劇愁添老病風塵閒想卻風流延陵三號悲何限漫怪西河卜子憂載前志

湯民新字懋先素篤孝友明末見左兵擒世父經祖力救爭死致傷左臂仲父紹祖年老將五歲孤託之代理家業民新視同己子延師配婦無不殫厥心力迄病篤時屬己子之相將其原託財產概還之毫無所私人皆稱

### 其古道載府志

何中圖字兆生邑庠生天資篤厚醇謹自好恂恂執禮有古人風口不道阿堵物雖屢空不給澹如也以孝友著聞順治丁亥歲荒家徒壁立躬親負米于數百里之外以奉甘旨當明末悍賊黃朝宣專殺無忌有胞弟錦六遭擄歸楚獨能不畏強禦挺身冒刃徃復陳說賊感其義弟得生還鄉里驚嘆自是浮雲富貴惟以課兒讀書爲事爲文不屑時趨力追先正遊其門者經其指授皆中法程子定基邑廩生孫大任副貢生載府志

袁克英字紫雲邑庠生性孝友世父一鰥任寶慶知府屢



招入署以親老辭不就親疾躬侍湯藥數月不少懈居  
喪悲號骨立里人欲爲廢蓼莪後伯父投簪寢病以子  
克密幼孤無託知英嚴氣正性召以屬之英泣受命代  
任教育婚娶朝夕以承先志續先緒爲訓維時內外猜  
忌克密稍信讒人有以可諉爲言者英始終如一曰先  
大人言猶在耳不可以貳書正大光明無辨不爭八字  
于座並著扶孤錄藏之家牘後克密成立由庠生以軍  
功授衡山典史發牘得遺書爲之感泣以位卑祿薄未  
報兄恩爲恨焉克英子三振翰振朝俱郡庠生孫起濤  
進士歷太平洛陽知縣起涵郡廩生起淮起洵俱邑庠

生其孝友家法子孫蓋世守之載府志

朱應星光祺孫歲貢生博學著文名年甫十歲侍母疾不  
離左右及沒號泣廢殮人稱純孝尤善事繼母內外俱  
無閒言壯歲失偶終身不娶居鄉排難解紛扶危濟急  
非分之物一介不取授瑞金訓導卒於官瑞邑紳士製  
有誄詞子松柏俱庠生載前志

盧衡字伊登歲貢生早失怙母晏氏年十九守志衡伶仃  
孤苦相依爲命母勤織紵竭力訓衡衡亦力奉甘旨癸  
未獻賊寇袁奉母逃匿山中夜歸負米爲賊所執哀告  
以孀母在室賊憐而釋之母冰節五十年衡志養足慰



晚節子光歲貢生器宇渾厚足繼前光載前志

李從時字靖公京子郡廩生少擅才名篤學好古尤敦友愛弟待時早夭遺腹誕孤日豐從時視如己出甲寅糊逆冒刃攜姪遠遁寇平歸里經營荒蕪婚教皆殫厥心力迄日豐年壯始令與子均分田產毫無所私其生平大義類如此七蹟棘闈甫及歲貢而卒爲文古雅秀麗更工詩賦著有冥鴻小嘜詩一卷人傳誦之子日升邑庠生載前志

易焯字孟戒尙行子邑庠生康熙初年衛軍失伍有同姓旗丁牽報尙行造糧艘焯不忍父勞請于上求以身代

不許再三乃可督造洪都長官刻期視成時家族遠竄無一分任者資盡工繁憂勞成疾年三十四客死舟中遺孤二次子堯歲貢生載前志

甘學益字友謙邑庠生端方純篤孝友性成父時達甫及歲薦而卒益甫七歲奉母夏氏以孝稱值荒亂伶仃孤苦竭力以奉親寇至夜負母疾趨得免于難母怒則俯伏請罪有疾則寢食俱廢祈以身代依膝下三十餘年胞兄學夔亦及歲貢而卒爲之調護孀室併撫其養子或謂非其嫡姪益曰吾兄乏嗣養子卽兄子也豈可令其失所以負吾兄於地下哉生平修橋梁助婚葬多義



舉知縣江浦下車廉其實行舉飲賓堅辭不就子汝懋  
弱冠中康熙己卯舉人次汝權邑庠生載前志

陳熺昌字景亭之龍曾孫邑庠生穎悟絕倫髫齡遊泮屢  
受知於當事天性孝友婚方二日值母病衣不解帶獲  
痊始退宿私室居平處昆弟式好無尤祖母遭危疾夜  
稽顙北辰願以身代次日果無病卒祖母遂不藥而愈  
人皆驚爲孝感載前志

劉冠英字掄揆邑庠生天姿純篤事親孝色養兼至不慕  
榮名菽水承歡親八旬寢疾三載躬侍湯藥依依牀第  
間衣不解帶易簣哀毀居廬治喪遵家禮不事浮圖其

弟遠賈不歸憂憤成疾終身不憚子幼發邑廩生詳儒

林傳長發舉人孫履謙邑庠生履豫廩生載前志

楊其善字無異邑庠生性孝友矢志清修不事生產父開

泰疾終廬墓三年孝事厥母友于兄弟人無間言載前

志

盧聲字公階歲貢生寧州訓導居家敦孝友撫從子爲完  
配給產如所生載前志

湯之相字尹叔民新之子邑廩生精研易理工詩文家屬  
空處之恬如父沒撫弟之傳成立甲寅寇變與之傳俱  
爲賊執之相以金與賊得脫復索之傳金無有欲殺之



之相曰弟未娶無後某已有子願將己金贖弟某當就戮賊義而兩釋之屢試不售設教南泉從遊多英雋士著有周易圖定解竹園詩草年六十四卒載府志

李道賢字伯萃由邑增生入監孝友敦篤親有疾湯藥必嘗居喪哀毀盡禮好施予戊午歲疫捐穀濟饑貧不能營葬者輒助棺殯之族有鰥曠則多方設措以完其家室仲弟道贊以從事候選季弟道賀業儒子世珍世球另傳載前志

劉希濱字頴上監生甫十齡父沒事祖母彭氏母段氏承歡養志不忘孺慕之誠里人有爭得希濱一言卽解歲

歉減價平糶有司屢旌其門子機廩貢生權廩生和增貢生載府志

梁揆字端侯佳植次子幼入邑庠屢爲督學賞識獨不得志於鄉闈乃援例入監事親就養無方親疾憂形於色中夜傍徨居喪盡禮恪遵遺訓不用浮圖友愛同氣睦娣任卹大節無虧子錦鶴郡增生另傳載前志

傅廷訓郡庠生性至孝定省維勤親亾泣血三年哀毀骨立以疾卒妻黃氏年十八生子滋霖甫四月以柏舟自誓和丸畫荻教之早遊黌序載前志

袁振裕字如饒邑增生渾樸有古風與弟怡怡至老不析



爨口不談阿堵物晚年舉鄉飲賓子三登科者二以孫  
芳松 贈資政大夫參載府志

袁起炳字蔚其性孝友克承父志督家政不私貨財惟以  
詩書為寢食子芳松由舍人遷侍讀或謂之曰公子已  
貴顯讀書何為炳笑曰讀書顧以博科名乎且人生各  
有分內事雖父子不相代也乾隆丁卯舉於鄉後  
贈資政大夫載府志

盧錫祐庠生與弟錫禧同心孝友父文波家頗饒被盜執  
縛拷掠其財二子年俱幼爭以身蔽父盜感而釋之兄  
弟自少壯至老不析產同爨而食內外式好無尤人號

為義門年俱八十卒載府志

彭宏譽廩生幼讀孝經即求師釋其義年十二喪父哀痛  
盡禮母多病禱於父靈願以身代督學林枝春廉其行  
舉優生未幾卒載府志

李世珍字玠儒郡增生乾隆己未舉飲賓弟世球兄弟友  
愛幼失母哀慟仆地父憂之浼親友勸諭稍解繼懼父  
喪持齋三年逢朔望具雞黍酒菓祭墓康熙己卯鄉染  
疫痢買藥製丸散濟人有母黨易氏申表維峻乏嗣病  
篤召珍兄弟至榻前以妻遺腹相託闕月果生男珍兄  
弟迎母子至家以養以教至十七歲送歸授室有古程



聖風

陳繼道字敬承邑增生潛心舉業博通經史七赴棘闈康熙丙子以額滿見遺居家不離慈幃左右親沒構獨坐軒祀雙親像以盡追慕意著有史學分鑒康熙己亥舉鄉飲賓

廖富字俊侯父母病篤焚香籲天求以身代及沒廬墓山中晝夜號泣如是者數年乾隆癸亥乙丑歲歉減價平糶鄉鄰德之子四廷佐吏員廷標監生廷新業儒廷玉邑庠生孫世忠邑庠生曾孫家傳例貢生家欽家鳳俱監生家桂家珍俱庠生

李宗顯性至孝母易氏病數年服侍不離其側雍正九年元夕母疾篤宗顯私禱父靈引刀割股肉和藥以進母疾遂瘳時年三十一事聞知縣王額以孝友可風母沒廬墓三年

劉琢邑庠生性質實孝友性成父維廷先娶妻黃生琢繼娶伍又生子璧者職瑛瑛珩郡庠生瑚五人維廷故伍命琢約束諸弟琢事伍亦如嚴父諸弟唯唯聽命畢力經營家遂饒昆弟子姪近百人同爨八十餘年雍睦無間書香振振琢又率諸弟陰行善事有族弟友璜幼窘迫引與同居財產均分其他賑貧掩骼不一知縣成元



一額其間曰樂善可風

易樹袞字錦章庠生淑霖子性質直端方十齡失怙哀毀如成人祭祀不衰奉寡母高氏溫清定省如禮乾隆癸亥歲荒饑民百餘擁入其家母驚避樹袞使妻熊氏護母急出口汝輩爲粟而來獨不聞吾賊饑竭廩耶何得笑驚吾母饑民抱慚而去昆弟式好無尤五弟樹高幼爲房叔嗣樹袞閔其產薄稟母及胞叔淑霖贈以滸浪橋田三百把妻兄顯大夫婦早世遺女無依鞠育遣嫁臨卒惓惓囑煥謨捐田以益宜陽書院膏火子三燉誠煥謙煥謨俱邑庠生孫塋在核在鄰在愷俱監生

蘭墀經邦俱邑庠生曾孫開元庠生

易殿掄性至孝父母疾篤籲天祈以身代及沒哀毀骨立幾欲身殉昆弟四人友愛無間季弟早世爲撫育其子至成立子中定監生中舒庠生中宜職員孫大謨庠生謝煜庠生幼時失母事繼母無間言從兄讀父書遊泮後教四弟俱有才名子步垣職員孫中柱庠生家傳監生袁芳谷字景明起藻子性仁孝讀書識解最超以府案入邑庠生家貧奉親獨厚侍親疾不解衣父沒廬墓三年母喪亦如之與弟芳立同居不析爨人競稱之

李宗齡天性孝友母易氏患瘋疾數年侍奉起居無倦容



宜春原元 卷三  
兩弟早世撫其遺孤教育有成嘉慶乙亥舉飲賓卒年八十四歲子筠職員孫載颺邑庠生

廖廷新字載言事父母遇病衣不解帶居喪水漿不入口數日時有鄰人貧乏欲出其妻卽爲給衣服錢米俾得完其室家孫家珍邑庠生

劉師周舉人師殷弟少失怙家貧奉孀母負米供甘旨母病籲天願減亡算及沒撫棺號泣不已廬墓三年

易起文字豹占童試屢拔前列數奇不偶性孝友五歲失恃事繼母得其歡心隨兄文藻學怡怡和順人顏其堂曰友愛兄沒寡嫂無嗣奉養終老以第四子曰庠承祧

嘗捐學俸倡建祖祠購祀田家雖貧猶耽鑑史叢書及醫卜堪輿家言以子曰廉 贈儒林郎

劉炳藻飲賓魏棟子性孝友質樸長兄業儒炳藻力田代父理家侍奉不離左右父沒廬墓斷葷不事盥櫛未幾以毀瘠致死

湯學詩邑庠生父病數月不解衣居喪廬墓三年少失母事繼母如所生常代錢息鄰里爭訟修橋路亦不惜費晚年舉鄉飲賓

易煥紳字席珍庠生性溫和父患咯血症視湯藥不解衣者年餘母年逾八十出入扶持不離左右子三均邑庠



生在陽監生



宜春縣志卷二十三

寓賢志

從來名賢托足之區山川城邑與有榮施况君子居是  
邦即為一邦矜式其惠然肯來適彼樂土或因友教或  
藉宦遊當時事屬羈棲已往遂成名跡千百載後猶令  
人低徊景仰於不置云志寓賢

宋

李觀南城人有文名仕太學說書范仲淹疏薦於朝嘗寓  
袁適知州事祖無擇創州學觀為作記即世所稱三絕  
碑



王覲泰州人舉進士擢右諫議劾罷章惇黨四人紹聖初除寶文閣直學士知成都府移河陽貶少府少監分司南京袁州居住載王偁東都事畧

陳瓘字了翁一字瑩中南劍人徽宗初爲左司諫遷右司員外權給事中上書攻章惇蔡卞又以書詆曾布過失布怒出知泰州崇寧中除名竄袁州宣和間卒靖康初贈諫議大夫謚忠肅載宋史宏簡錄

按宋集瓘攻章惇蔡卞罷去又以書詆曾布論日錄及國用事觸怒編管袁州移康州嘗爲蔡卞所薦而攻卞嘗曰彼則舉爾所知此則爲仁由已識者重其言第瓘

未任袁官不解袁州府學名宦祠祀之何故

曹輔字載德福州人登進士第政和六年以通仕郎歷祕書省正字疏諫微行竄郴州六年移袁州居一年召爲校書郎靖康間官至尙書左丞同知樞密院事封福國公謚忠達

吳師古宜興人舉進士紹興初胡銓上書阻和議乞斬秦檜師古鋟木傳其書忤秦檜流袁州卒載宋史宏簡錄知浹汾州人通春秋左傳好直言岳飛待以賓禮飛下大理獄浹上書訟其寃坐流袁州載明一統志

洪皓字光弼饒州鄱陽人紹興中使金不屈留十五年歸



除徽猷閣直學士忤秦檜竄英州九年復朝奉郎徙袁州卒年六十八帝聞嗟惜之載宋史

范成大號石湖居士乾道癸巳至袁州聞仰山名勝特往遊之謁二王廟晚出山復入袁州登化成巖鐫壽楹二字於石壁傍注石湖居士摹

紫陽朱晦菴帥湖南道經宜春見山川清絕遊仰山遂講道四藤閣郡士李長明胡安之輩皆受業焉

陳公璟字師宋新蔡人曾任西和州居袁之宜春子元勳從政郎前道州軍事判官元老將仕郎嘉泰二年卒葬于宜春信義鄉德成里貂石楊萬里誌墓

元

虞集字伯生撫州人累官奎章閣學士至元五年過袁州作新建尊經閣記并宜春臺詩詳藝文

吳澄號草廬崇仁人大德十年授徒袁州有詩題唐西平王裔李氏族譜後勲業隆先代流波衍後昆西平十五子南土百千孫節度開今派分宜有古墳縉紳從此盛不是出寒門

李稷字孟賓滕州人幼穎敏八歲能記誦經史從其父官袁州師夏鎮又從官鉛山師方回孫鎮與回孫皆名進士長於春秋稷兼得其傳大定四年進士歷御史丞加



宜春縣志 卷三  
榮祿大夫載前志

胡泰字志同奉新人元末以舉人任上高教諭既而避亂  
袁州明初徵不起締交劉孫父輩工詩文書法以自娛  
上高宰黃權寄以詩云相別未多日相尋勞夢思更求  
四幅字要寫五言詩莫遣圖書祕爭傳草聖奇籠鵝無  
道士興至且臨池詳元集

明

楊子將泰和人少師文貞公士奇之父元至正甲辰避兵  
於袁居二年生士奇於鳳凰臺側子將歿士奇甫週歲  
母陳氏夫人抱遺孤畱袁幾不能歸外祖陳庸躬涉艱

險來絜子將之喪與陳夫人及士奇歸泰和時洪武元  
年也文貞初名寓字士奇一字僑仲以僑寓宜陽故子  
將累贈至少師兵部尙書兼華蓋殿大學士載府志



